

Proberbs

(Proverbs)

Hay A'at Tuwen Liblu An Proberbs

Hituwen Proberbs ya hay nitudo' ituwe ya nadan tudtudun di nun'anomnoman an umat i Solomon. Te hay pangimatanan an nanomnoman nanohan tagu ya hinan pangun'unudana i Apu Dios. Ya hay hipun tuwen nitudo' hitu ya hay nuntudtuduan Solomon hinan imbabalena an alyonay, Nan nanomnoman an tagu ya hi Apu Dios di un'unudona mu nan adi umun'unud ya paddungnay ma'id ha nomnomna. Ya nan athidin tagu ya dusaoon Apu Dios. Ta hiya nan intugun Solomon an mahapul an innilaon nan a'at di nanomnoman. Ya hay nangipaddungana i Apu Dios ya hinan la'ing an paddungnay mun'ayag hinadan tatagu.

Hay Nitudo' Ituwen Liblu

1. Hay tugun ta manomnoman ya luma'ing diohan tagu ta adina iyunnud hinan at'atton nadan paddungnay ma'id ha nomnomna (Proberbs 1-9)
2. Hay numpahhiwan nan tagun nanomnoman ya nala'ing yanantau paddungnay ma'id ha nomnomna (Proberbs 10-15)
3. Hay ma'at hinan maphod di pangatnan tagu ya nan ma'at hinan adi maphod di pangatnan tagu (Proberbs 16-31)

Hay Iyatan Datuwen Tuditdu

1 ¹Datuwe nadan maphod an tudtudun Solomon^a an imbabalen David an patul ni' nadan tinanud Israel. ²Datuwen tudtudu ya ipa'innilanay aton ta'un manomnoman ya matugun ta maphod di pangat ta'u ya atbohdin bumoddang hi panginnilaan ta'uh nadan tudtudun naligat an ma'awatan. ³Ya bumoddang boh aton ta'un matudduwan ta maphod di pangiy'e ta'u ya nipto' di aton ta'u ta ma'id ha pangipangngelan ta'u. ⁴Ta ta'on on nadan agge nanomnoman ya mabalin an matudduwanda.

^a **1:1** Niddum boy tudtudun di udum an tatagu.

Ya nadan mumpangilog ya adalonda hi'on nganne nan nipto' hi atonda.

⁵ Ya ta'on on nadan nun'anomnoman ya maphod on mundongolda ta ma'udman nan innilada ta abalinandan manginnilah nan nipto' an aton. ⁶ Ya bumoddang datuwen maphod an tudtudu an umat hinadan waday nipa"elana ta mabalin an ma'awatan nan ibalinan nan hapit di nanomnoman ya nadan udum an tudtudun naligat hi ma'awatan an umat hinadan nipa"el.

⁷ Ot nan tagun waday takutna i Apu Dios ya hidiyey ihipunan di luma'ingana. Mu nan paddungnay ma"id ha nomnomnan tagu ya pihiluna nan maphod an tugen di nanomnoman.

Hay Mahapul An Innilaon Ha Mangilog An Imbabale

⁸ He'an imbabale^b ya ihamadmun unudon nan tugen da amam i inam. ⁹ Te nan ituddudan he'a ya ipaphodnay pangatmu ta umat hinan aton nan maphod an pongot onu maphod an banggol an paphodonay tigon diohan tagun mangusal. ¹⁰ Ot he'an imbabale ya adi'a mihapitan hinadan tatagun mangmangngat hi pumbahulan ¹¹ an ta'on on alyondan he"ay, Ma'a ta mi'yali'an da'mi ta eta'u mumbota' hi kumpulnan mundundunnu ta patayon ta'u. ¹² Ta paddungnay ihakmal ta'u on innayun ta'un inaminul dida an ta'on onda matagu. ¹³ Ta wan mapnuy bale ta'uh nadan alan ta'un nun'abalol an gina'uda. ¹⁴ Ot agam ta mi'yali'an da'mi ta wa'e ha inala ta'u on ginogodwa ta'u.

¹⁵ Mu hanat ta'on onda atonhidi i he'a an imbabale ya adim ipatnan ma'maye i dida. ¹⁶ Te dida ya hi kittang on pumateda ya gahin ahan onda mangat hi adi maphod. ¹⁷ Nadan hamuti ya adida makna hi'onda tigtiggon di pang'i'apyan hinan puntawang i dida. ¹⁸ Mu adi athidi i danaen tatagu te onnot on diday ay mangap'apyah ahablutanda ta mateda. ¹⁹ Te athinay pumbalinan nadan tatagun e pumatepate an gapuh omnodah nan mikadangyan.

Hay La'ing Ya Ay Mun'ayag Hinan Kalata

²⁰ Hay la'ing ya umat hinan babain mun'ayag hi tataguh nan kalata ya hinan a'am'amungan di tatagu. ²¹ Ya umat boh nan tagun e tumukutukuk hi awadan di dakol an tatagu ya hinan hawwangon hinan boble ²² an alyonay, Da'yun agge nanomnoman ya undan agge ayu immengleh nan athinan a'atyu. Ya ta'on on da'yun mungnohe ya da'yun adi maphod di nomnomna ya anuud ya ahi ayu matudduwan. ²³ Hi'on donglonyu nan pangihingal'un da'yu ya nomnomnomonyu an idattan da'yuh maphod an nomnom ya impa'innila' i da'yu nan wah nomnom'u. ²⁴ Mu ningamut an adiyu pohdon an ta'on ona' umaya'ayag. Ya unhaot dingngolyu nan

^b 1:8 Hay nangali ituwe ya hi Solomon.

pinadana' i da'yu. ²⁵Ot gapu ta aggeyu hinangut nadan tugun'u ya adiyu abuluton nan pangihingal'un da'yu ²⁶ya ahi da'yu ngihngihilan i ha"on ya dinildilah hitun dumatngan di adadaganyu an nunhiglay punligatanyu. ²⁷Ta ay mabikah an puwo' ta pun'eye'e da'yu ta i diye ya nunhiglay inomnomanyu ya punligatanyu. ²⁸Ya mumpaboddang ayu mohpe i ha"on mu adi da'yu tobalon an ta'on on adi ayu mangmanghop an e manama' i ha"on mu adi ayu pa'ahamma' i ha"on. ²⁹Te ningamut an adiyu pohdon an matudduwan ya atbohdin adiyu pohdon an ha"on an Dios di takutanyu. ³⁰Ya gapu ta adiyu abuluton nadan tugun'u ta ngohayonyu nadan panugun'u ³¹ya apitonyu nan imbungan nadan ina'inatyu te nunhiglay ma'at i da'yu an gapuh nan a'atyu. ³²Te inwalongyu nan tugun ta umat ayuh nadan agge nanomnoman ta hiya nan palpaliwanyu ya mabahbah ayuh umudi. ³³Mu nadan mangngol hinadan tugun'u ta un'unudonda ya malinggopda ya madinolda te ma"id ha itakutdah ma'at i dida.

Hay Ma'at Hinan Nanomnoman

2 ¹Imbabale', igongaham tun itugun'un he"a ta hiyay pun'onanom hi nomnommu. ²Ta wan adalom di atom an manomnoman ya luma'ing. ³Ot pohdom'en ma'awatan nan ituddun nadan nun'anomnoman ⁴ya mahapul an adi'a mangmanghop ta umat hinan atom an manama' i ha natala' hi pihu onu ha nipa"eh nablol an odon ta ingganah onmu hama'on. ⁵Ot gahin di athidiy atom an manama' ta mabalin an innilaom di a'at Apu Dios ya ma'awatam di a'atna hi'on waday takutmu i hiya. ⁶Te hi Apu Dios di mangdat hi la'ing ya abalinan an manginnilah an namin nadan nahamat hi ma'adal ya nan abalinan an manginnilah nadan nipto' hi aton. ⁷Ya waday indadaana an nipto' an tugun an midat hinadan mangat hinan pohdona ta hiyay ay hapiyodan mangun'unud i hiya an Dios. ⁸Te ipappapo'na nadan maphod di pangatda an nanongnan umun'unud i hiya. ⁹Ot hi'on unudom nadan tugun'u ya innilaom an mangat hi maphod ya nipto' ya ta'on on nganney ma'at ya innilam di nipto' hi atom. ¹⁰Te manomnoman'a ya mipa'amlong'ah nan na'adalmun tudtudu. ¹¹Ot nan abalinam an mangimatum hinan nipto' ya nan maphod an pangat ya diday ay mangipapto' i he"a. ¹²Ta nan em anomnoman di mangihwang i he"ah nadan at'atton nadan adi maphod di pangatda an tatagun bumahbah di hapitonda. ¹³Te dida ya inwalongda nan nipto' an pangaye'e ta nan ay nahilngan an pangaye'e di impa'inghadian aton. ¹⁴Ya hay pun'amlonganda ya nan pangatandah nadan adi maphod an bumahbah. ¹⁵Ya inaynayunda nan kuluk an pangatda te ningamut an malayyahda.

¹⁶Mu hay oha boh iyatan nan e anomnoman ya mibaliwda hinadan mi'ilala'i an binabai an ta'on onda nalahir ya eda bumalbalih linala'i an gapuh nan panapitda. ¹⁷Te tinaynanda nan ahawada ta imbahhoda nan

imbagadan atondah din nun'addumanda. ¹⁸Ot nan lala'in e mi'yinghah nan athidin babai ya paddungnay i'wanah nan awon di atayan ta e middum hinadan nate. ¹⁹Te ma"id ha lala'ih e mi'yingha hi athidin babai ya mabalin an mibangngad hinan a'at di nitaguwanah din hopapna. ²⁰Ot hiya nan mahapul an iyunnudanmuh nan pangat di nun'anomnoman ta nan nipto' an pangat di ipa'ingham. ²¹Te nan mangat hinan pohdon Apu Dios an dida nan nipto' di pangatda ya diday mabati hi munhituh nan numboblawayanda. ²²Mu nadan adi maphod di pangatda ya nadan mumpunlayah ya mapogpog di nitaguwanda.

Hay Tugun Hinan Mangilog An Lala'i

3 ¹Imbabale', adim linglingon datuwen itutudu' i he'a te mahapul an iha"admuh nomnommu ta hiyay inaynayunmun unudon.

²Ot atom'ehdi ya malingngop'a ya dumukkey pi'taguwam hitun luta. ³Ya adim idinong an mangipatigoh homo'muh ibbam an tagu ya adim ilaylayahhan dida ta aymu ibanggol nan nipto' an pangat ya atbohdin iha"admuh nomnommu ta ay nitudo' hidi. ⁴Ot atom'ehdi ya umipa'amlong'a i Apu Dios ya ta'on on nadan tatagu.

⁵Ya hi Apu Dios di pangidinlam hi an namin an ma'ma'at hi nitaguwam ta adim idinol hinan malpuh nomnommu. ⁶Ya an namin di nomnomnom hi atom ya bagaam hi Apu Dios ta wan ipa'innilanan he'a nan nipto'.

⁷Ya adi namaaggan inalim hi nomnommuy innilam an namin di at'attom. Mu hanat waday takutmu i Apu Dios ta adim aton nan nibahho. ⁸Te hidiyey mangipaphod hi punnomnom ya ta'on on hayadol ta mapmaphod di li'nana.

⁹Ya dayawon ta'uh Apu Dios hinan kinadangyan ta'u ta ipabangngad ta'un hiya nan mamangulun apiton ta'u. ¹⁰Ot aton ta'u'ehdi ya mahawwalan di apiton ta'u ta ma"apnu nadan alang ta'u ya atbohdin nadan buhi ta'u an mamapnuh nan pinahapah an bayah.

¹¹Imbabale', adi'a bumungot hi'on da'a ihingal i Apu Dios hinan nibahhawam ta abulutom an hidiye ya panugunan he'a. ¹²Te nan tagun pohpohdon Apu Dios ya titilgonah nan nibahhon at'attona an umat hinan aton nan ama hinan imbabalenan umipa'amlong i hiya.

¹³Ot mipa'amlong nan tagun pinhodnan manomnoman ta innilaona nan nipto' ya nan nibahho. ¹⁴Te ongal di iboddangnah nan nitaguwan mu nan pillu ya balitu'. ¹⁵Te nababalol nan e anomnoman mu nan nababalol an rubi onu nan kumpulnan mikadangyan. ¹⁶Ya nan nanomnoman ya dukkey pi'taguwana ya kumadkadangyan ya atbohdin mapemanan ¹⁷ya malinggop ya waday amlong hi nitaguwana. ¹⁸Ya umat boh nan bungbunga'an an mangdat hi itaguwan ta hiya nan mipa'amlong nan tagun nanomnoman.

¹⁹ Hi Apu Dios ya limmuna tun luta ya ad abunyan ya an namin di wada an gapuh la'ingna. ²⁰ Ya gapu boh la'ingna ya winadanay baybay ya wangwang ya wa"el ya hay udan an malpuh nan bugut.

²¹ Imbabale', hanat minaynayun nan maphod an nomnommu ta way atom an mangimatin hinan nipto' ya nan nibahho ta adim iyabulut an mama"id danaen he"a. ²² Te danaey mangdat nimpe hi pumhodam ya nan nahamat an pi'taguwam. ²³ Ta madinol'a an mi'daldallanan an ma"id ha ihali'dudam. ²⁴ Ya malinggop hi em alo'an te ma"id ha itakutmu. ²⁵ Ya adi'a minomnoman hi'on waday dumatong hi punligatan hinan nitaguwam ta adi'a umat hinan tagun adi maphod di at'attona an hidiyey manadag i hiya hinan dumatgan di punligatana. ²⁶ Te ipapo' da'an Apu Dios ya adina iyabulut an paddungnay makna'ah nan hulu.

²⁷ Ya adim ukuhan an bumoddang hinadan munhapul hi boddang hi'on mabalinam. ²⁸ Ta wada'ey umalin mumpaboddang ya adim alyon hi indanit bigat hi'on mabalin an boddangam i diyen algo.

²⁹ Ya adim nomnomnomon an mangat hi adi maphod hinan hinaggonmun waday dinolnan he"a. ³⁰ Ya adi namaaggan pinabahulmuyohan tagu an namamah on ma"id ha inatnan he"ah adi maphod.

³¹ Ya adim amohan nan mabungot an tagu ta adim iyunnud hinan pangatna. ³² Te hi Apu Dios ya nunhiglay bungotnah nan adi maphod di pangatna mu maphod di pi'hayyupanah nan tagun nipto' di pangatna. ³³ Ya adina wagahan nan adi maphod di pangatna mu wagahana nan nipto' di atona. ³⁴ Te hi Apu Dios ya ngihngihilana nan mumbaktun tagu mu ongal di boddangnah nan tagun nanongnan mumpada"ul.

³⁵ Nan nanomnoman an tagu ya malisitu mu nan paddungnay ma"id ha nomnomna ya mibabain hi tatagu.

Nan Maphod An Tugun Di Ama Hinan Imbabalena

4 ¹ Da'yun imbabale' ya igongahanyu tun tugun'un hi amayu. Ta ihamadyun donglon ta wan manomnoman ayu. ² Te hituwen ituddu' ya maphod ot unudonyu ta adiyu linglingon. ³ Hidin a'ung'ungnga' an wadaa'i da ama ya pa"ipapo'a' i ina te oh'ohhaa' an imbabalena. ⁴ Ta intanudduwana' i ama an alyonay, Imbabale', ihamadminun donglon tuden tugun'u ta hiyay un'unudom ta malinggop di itaguwam. ⁵ Ya maphod on hay gamgamam hi mawadan he"a ya nan em anomnoman ya nan abalinam an manginnilah nan nipto' hi aton. Ya adim linglingon datuwen ituddu' ta un'unudom ta adim iwalong. ⁶ Ta adim iwalong di em anomnoman te hiyay ay mangipapo' ya mangibaliw i he"a. ⁷ Te ma"id ha udum hi nababalol mu nan e anomnoman. Ot atom an namin di abalinam ta way atom an manomnoman an ta'on on ibayadmun namin nadan wadan he"a muta manomnoman'a. ⁸ Ot atom'ehdi ya lo'tat ya mumbalin'ah mapemanan an tagu. ⁹ Ta paddungnay nungkorona'a i ha mapmaphod an korona.

Hay Adi I'uyugan Hinan Adi Maphod Di Pangatnan Tagu

¹⁰He'an imbabale' ya onha donglom tun ituddu' ya inun'unudmu ot madukdukkey pi'taguwam hitun luta. ¹¹Te hay ituddu' ya nan pangat di nanomnoman an tagu ta bumoddang hinan em pangatan hinan nipto' an pangiy'e. ¹²Ot unudom'e ta matigoh nan pangatmun nanomnoman'a ya ma'id ha bumahbah nan em pi'taguwan ta ta'on on aymu tanagtagon on adi'a matukkad. ¹³Ot un'unudom nadan dingngolmun tugun ta adim linglingon te datuwey mangdat hi maphod an itaguwam. ¹⁴Ta adim iyunnud hinadan tatagun adi maphod di pangatda te hidiyey impa'inghada. ¹⁵Ot mahapul an adi'a ma'mayat hinan athidin pangat ta adim gotten an iyunnud hinadan at'attonda ta onmuot padutu'an di nitaguwam. ¹⁶Te nadan tatagun athidiy a'atda ya adida duminong ta ingganah on waday atondah adi maphod. Ya adida malo' ta ingganah on waday dadagondah ibbadan tagu. ¹⁷Te dida ya nan pangatandal nadan adi maphod an abahbahan di ibbaday ayda i'ilog. ¹⁸Mu nan nipto' an pangat ya mipaddung hinan patal hinan mun'abigat an pumatal an pumatal ta ingganah on mangimpapatal. ¹⁹Mu nan adi maphod an pangat ya umat hinan nunhiglan munhihillong ta adida tigon di agahanda.

Hay Punhalipopdan Hi Pangat

²⁰He'an imbabale ya igongaham ta pa'addonglom an namin tun ibaga'. ²¹Ya inha"admuh nomnommu ta ma'id ha ta'on on ohah malingling. ²²Te nan tagun mangun'unud i datuwen tugun ya nanongnan maphod di pi'taguwana ya pumhod di li'nan diadolna. ²³Ot mahapul ahan an guwalyaam nan punnomnommu ta wan nan maphod di nanongnah mun'onan te hiyay paddungnay obob an mangdat hi itaguwan. ²⁴Ta adim gotten an hapiton di layah ya nan kumpulnan lummuh abaliyan di ibbam an tagu. ²⁵Ya tigom ta adi'a mahaliyah nadan mahapul hi atom ituwen atagum ta umat'ah nan tagun padutu'anan umeh nan pangayana. ²⁶Ta hiya nan pa'annomnomom hi'on nganne nadan nipto' an pangat ya dadiyey inatmu. ²⁷Ta adim aton di kumpulnan adi maphod ta nan nipto' an pangat di inaynayunmun aton.

Hay Adi Punluktapan

5 ¹Imbabale', igongaham tun tugun'u ta hiyay nomnomnomom ²ta wan innilam an mamilih maphod hi atom ya hapitom.

³Hanan babain mi'ilala'i ya huma'ul te maphod di panapitna an ay malumih an danum di iyukan ya ay lanan di olibo. ⁴Mu hay umudi ya han ligat ya hakit di nomnom di angangonah nadan linala'in nabaliyan. ⁵Ya nan lala'in miyun'unud hi athidin babai ya hidiyey lummuh atayana.

⁶ Ya nan athidin babai ya ma"id hi nomnomna nan lummuhi pi'taguwan te nan nibahhoy at'atona mu aggema innilay pumbalinan nan at'atona.

⁷ Ot he'an imbabale' ya igongaham hituwen tugun'u ta adim linglingon.

⁸ Hay maphod ya adi'a e miyun'unud hinan athidiy a'atnan babai ya ta'on on hinan balena ya adi'a e mihaghaggon hidi. ⁹ Te undan pohdom an ipatigoy pamhodmuh nan athidin babai ta lummuhi ma"id ha pamiyal di tatagu i he'a ya pinaligat da'ah nan mabungot an ahawana. ¹⁰ Ya inalan di udum an tatagu nan kinadangyanmu ya an namin an nablayam. ¹¹ Ta hay umudi ya ma'ulat'a ta ingganah on ammunay tungalmuh mabati ta nunhiglay em umukayungan. ¹² Ya ahim mohpe alyon di, Athituy na'at te agge' pinhod an patugun. ¹³ Onha inunud'u nadan nun'anomnoman an nuntudtudu ¹⁴ ot wan adi nunhiglay e' nipada"ulan hi ad uwani.

¹⁵ Ta hiya nan hay maphod ya adim tuwali iluktap nan ahawam ta hiyay nanongnah pohpohdom. ¹⁶ Te undan pohdom an wadaday imbabalem hi kumpulnan binabai? ¹⁷ Hanan nun'ahawa ya dida ya ammunna ta ma"id ha udum hi em iyun'unudan.

¹⁸ Ot hanat nan ahawam tuwali di nanongnah pun'amlongam. ¹⁹ Te mapmaphod nan ahawam. Ot hanat nanongnan umamlong'ah nan pamhodna. ²⁰ Ot he'an imbabale' ya adim ipatnan omnawan nan babain mi'ilala'i ta adi'a mi'mi'yeh nan babain waday ahawana.

²¹ Te hi Apu Dios ya tigtiggonan namin nan at'aton diohan tagu ta hiya nan innilan namin di pangapangayana. ²² Ot nan pumbahbahulan diohan tagu ya hidiyey ayna aknaan ta ay talin mamobod i hiya. ²³ Ta hay iyatena ya gapuh adina dumngolan ta hidiyey mangipiyan hiyah nan lubu'.

Adim Ihapit Nan E Munggawat

6 ¹ Imbabale', hi'on inabulutmun he"ay mangihapit i ha gumawat ² ta niluh an inatmu ya ay'a nahablut te mabalin an he"ay hingilonda.

³ Mu hay maphod hi atom ya e'a mumpahpahmo' hinan gimmawat ta adina ibahhon bayadan ta wan bokon he"ay pumbagaanda. ⁴ Ot adi'a madmadinnol an malo' onu mun'ible ⁵ ta ingganah umaan'a i diyen em nahablutan ta ay'a hamuti onu ulha an nihwang hinan mun'anup.

Hay Tugun Hinan Ma'ahiggan Tagu

⁶ Nan ma'ahiggan tagu ya maphod on itigonah nan pangat nadan gulom ⁷ te dida ya ta'on hi ma"id ha mummandal i dida an muntamu ⁸ ya ma"ugo'e ya inniladan mangidadaan hi anonda. ⁹ Mu nan ma'ahiggan tagu ya palpalawan malmallol'. ¹⁰ Ya alyona eh'ay malo' ni' i ha na'omtang onu op'opona ni' di ta'lena ta mun'ible ¹¹ ya pinalpaliwanaot ya ma'ma'idan an namin di mahapulnah nan nunhituwana an ay nahod'ap.

Nan Adi Maphod An A'at Di Tatagu

¹² Nan adi ahan maphod di nomnomnan tagu ya amod on nan layah di ena hapihapiton ¹³ ya amod on mungkodyat ya dakol di udum hi atonan bumalih tatagu ¹⁴ te hay nonomnomona ya hay ena punlayahan ta hiya nan an namin di umayana on wadan waday atonan bumahbah. ¹⁵ Athidiy amodna e ato'aton ta alinah on ay kimmaynit ya dimmatong ha nunhiglan punligatana ya ma"id mo ha ena pumhodan.

¹⁶ Waday pitun a'at di tatagun nunhiglan umipabungot i Apu Dios

¹⁷ an umat hinan mumbaktun tagu ya nan agge immannung di hapitonan tagu ya nan pumapateh ibbanan tagu an ta'on on ma"id ha bahulna

¹⁸ ya nan numanomnom hi adi maphod hi atona ya nan hi kittang on mangat hi adi maphod ya

¹⁹ nan layah di puntistiguna.

Ya athidi boh nan tagun bumahbah hinan maphod an punhahayyupan di tatagu.

Hay Adi Punluktapan

²⁰ Imbabale', unudom nan tugun amam ya atbohdin adim linglingon nadan intanuddun inam ²¹ ta iha"admuh nomnommu an aymu ibabanggol. ²² Ta dadiyen intugunday ay mangipappapo' i he'a hinan kumpulnan umayam ya ta'on on nan mahdom. Ya ta'on on hinan bumangonam ya datuwey nomnominomom. ²³ Te nan tugundan he'a ya umat hinan mumbinang an dilag an ituddunay pummaphodam. Ya atbohdih nan panitilogdan he'a an hidiyey panginnilaam hi a'at di maphod an itaguwam ²⁴ ta miyadawwi'ah nadan adi maphod di pangatdan binabai ya ta'on on nadan ay ma"aphod di hapitonan nun'alahn an binabai. ²⁵ Ot hanat adi'a maha'ul hinan amaphod di tigon diadolna onu hinan matana. ²⁶ Te nan mi'ilala'in babai ya mabalin an mabayadan i ha ipinghan an anon ya mabalin bon hiyay lummuh atayan nan lala'in nangiluktapana i ahawana. ²⁷ Te nipaddung hinan bala an undan mabalin an ikabuy ya adi maghob di lubung. ²⁸ Ya atbohdi an adi mabalin hi igoppa' hinan bimmalan apuy ya adi ma'atungan di dapan. ²⁹ Ot athidih nan lala'in e mi'iloi' i ha nalahin an babai te umannung an waday dusana.

³⁰ Te ta'on on nan mangakoh anona an gapuh inagangna ³¹ ya onha ma'akhupan ot ihaliwda ta hay pumbayadna ya mumpipitu hinan balol di inakona ta hinuddum ya mahapul mon ibayadnan namin nan wadan hiya. ³² Mu namamah nan umiluktap an lala'i an paddungnay agge nanomnoman te hiya ya dinadagnay nitaguwana. ³³ Te mi'patte nan ahawanahan hiya ya pihilon mon di tatagu ta mipada"ul hi inggana. ³⁴ Te

gapuh annel nan lala'in inluktapda ya nunhiglay bungotna. Ta hiya nan ma"id ha homo'nah pangiballohana. ³⁵ Ta ta'on hi atnay idatdah punhaliwana ya adina abuluton te adi ma'aan di bungotna.

7 ¹Imbabale', nomnomnom hituwen itugun'u ta adim linglingon an mangat hinan alyo' hi atom. ²Ta ihamadmun unudon nadan tugun'u ta hiyay nabalol i he"ah nan pi'taguwam. ³ Ta ipa'ingham an aton nimpe nadan tugun'u ta aymu intudo' hi nomnommu. ⁴ Ibilangmuh ay hi ibbam onu gayyum hanan tugun an mangdat hi anomnoman. ⁵ Te hiyay mangihwang i he"ah nadan umiluktap an binabai an ay ma"aphod di hapatonda. ⁶ Wada han naminghan an mun'uh'uhdunga' hinan tawah balemi ⁷ya minangmang'uy mumpangilog an linala'in agge nun'anomnoman. Ya wada hanohan mapto' an agge nanomnoman ⁸te inipluynah nan nundammuwan di kalata an nihaggon hi balen han babain mi'ilala'i ⁹yaden nahdom mo. ¹⁰ Ya nahanawwang hidiyen babain ena pundamu yaden mapto' hinan nunlubungna an ona tuwali ninomnom an bumalbali. ¹¹ Ya hidiyen bo udot an babai ya aggema innilan bumain ya ma"id ha ono'nongna ya impa'inghanan e munhawwangan. ¹² Ta kumpulnan awadan di tatagu ya wahdin munhood hi baliyana. ¹³ Ta umat hinan inatnah nan mangilog an lala'i an ona dinamu ot pun'idonan hiya ot awalona. Ya ma"id ha baina an namaag ya alyonay, ¹⁴ Waday ini'nong'u i Apu Dios hi ad uwanin algo ta inat'u din insapata' hi ato' ta hiya nan wahdiy makan hi balemi. ¹⁵ Ta hiya nan immaliya' ta hama'on da'a ya maphod ta inakhupan da'a. ¹⁶ Ya inabo'a' nan alo'an hinan mun'aphod di kololnan linen an nalpuh ad Egypt. ¹⁷ Ot ha"ada' boh bangbanglu an mira ya alos ya sinamon. ¹⁸ Ot ma'a ta umetah balemi ta eta mun'am'amlong an duwa hi ingganah nan mawi"it. ¹⁹ Ya alyona boy, Adi'a tumakut i ahawa' ot ma"id an adawwiy immayana. ²⁰ Ya ongal nan pihun binaluna ta hiya nan adi umali ta ingganah tun umongal nan bulan. ²¹ Ya nihapitan moh diyen lala'i an gapuh nan ma"aphod an nanapit nan babai. ²² Ot inayunan mi'uyug ta umat hinan baka an ipluynah nan pamalitiyandan hiya. Ya umat boh nan ulha an namaag ya ipluynah nan bitun agahaha. ²³ Ya nipaddung boh nan hamuti an inipluynah nan tawang te aggema innila an hidiyey atayana. ²⁴ Ot hiya nimpe nan donglona' i da'yun imbabale' ta igongahanyu tun ibaga'. ²⁵ Ta adiyu iyabulut an ihapitan da'yu i ha athidiy ababaina ta wan adiyu iwala' nan maphod an pangatyu. ²⁶ Te gapuh nadan mumpunlayah an binabai ya dakolday linala'in nadadag di nitaguwanda. Ta adi mabilang di linala'in nun'a'ate an gapun dida. ²⁷ Te nan lala'in e humgop hi balen nan athidin babai ya ayna inipluy hinan panton di lubu' ta hidiyen nimpey lummuuh atayana.

Hay Nipa"elan Di Anomnoman

8 ¹Donglonyu te nan e anomnoman ya nan la'ing ya nipaddung hinan tagun umaya'ayag. ² Ta ta'on on hinadan nun'abaktuh nan

bole ya hinadan numpundammuwan di kalata on wahdi. ³Ya hinadan hawwangon hinan boble on wahdin ay umaya'ayag ⁴an alyonay, Da'yun tatagu ya donglonyu tun ibaga'. ⁵Te nan agge nanomnoman ya mabalin an manomnoman. ⁶Ot igongahanyu tee tun ibaga' te maphod an ongal di boddangnan da'yu ⁷te immannung tun ibaga' mu ma'ahihhiwoa' hinan layah. ⁸Ta hiya nan an namin nan itugun'u ya miyunnu dan hinan pohdon Apu Dios an ma"id ha niddum hi bumahbah. ⁹Ot nan tagun nanomnoman ya abulutona an immannung tun ibagbaga' an ma"id ha nibahho. ¹⁰Ot maphod on hanan tugun'u di un'unudonyu ta wan hay eyu anomnoman di gamgamanyu ta bokon hanan pihu onu balitu'. ¹¹Te nan e anomnoman ya nababalol mu nan magamgaman an umat hi balitu'. ¹²Onha humapit hituwen e anomnoman ot alyonay, Ha"on an e anomnoman di nalpuwan nan la'ing ya nan abalinan an manginnilah nipto' hi aton ya nan nipto' an ma'adal. ¹³Ot nan waday takutna i Apu Dios ya nunhiglay aggema naminhodan hinadan adi maphod. Ya athidi boh nan anomnoman an nunhiglay aggema naminhodan hinan lattuwag ya bungot ya nan adi maphod an pangat ya panapit. ¹⁴Te ha"on an nanomnoman ya maphod di panugun'u ya punnomnom'u ya ongal boy abalina'. ¹⁵Ya ha"on di nalpuwan di abalinan nadan patul an mun'ap'apu ya ta'on on nan nipto' an uldinda. ¹⁶Ya ha"on boy alpuwan di abalinan nadan udum an ap'apu an mangipangpangulu ya mangipanuh hinadan tatagu.

¹⁷Ha"on an hi anomnoman ya pothohdo' nadan naminpinhod i ha"on. Ot nan adi mangmanghop an manama' i ha"on ya akhupana'. ¹⁸Te ha"on di nalpuwan nan kinadangyan ya nan e apiyalan ya nan nipto' an pangat. ¹⁹Ya nan ato' an munwagah ya nababalol mu nan namahmah an balitu' ya nan nanginan silber. ²⁰Ya hay inaynayun'un aton ya nan miyunnu dan hinan pohdon Apu Dios ta nipto' di ato' an mangipanuh hi tatagu. ²¹Te pun'idat'uh nadan tatagun naminpinhod i ha"on di nahamat an mikadangyan.

²²Hi Apu Dios ya ha"on an hi anomnoman di namangulun winadanah din hopapna ot ahina lumuwon an namin di matigo. ²³Te pinto'a' tuwalin pun'ibbana hidin ma"id ni' tun luta. ²⁴Ta hiya nan wadaa' tuwalih din ma"id ni' nan nalitingan an umat hi baybay ya ulih ²⁵ya ta'on on nadan billid. ²⁶Ya wadaa' boh din nunlumuwanah nan hopap di pito' ot ahi tun luta ya an namin nan matigo an umat hinan puntanoman. ²⁷Ya wadaa' boh din nangiphodanah ad lagud ya nan numbattanan di baybay ya ad lagud. ²⁸Ya wadaa' boh nunlumuwanah bugut hi ad lagud ya hay nangipatuluwanah liting hi dallom nan baybay. ²⁹Ya wadaa' boh nangimandalanah nan liting hinan baybay ta adina la"uhan nan nadutu' an pogpog hidin nangiyammaanah gopnad nan mamagan luta. ³⁰Ta ha"on di nanongnan nun'ibban Apu Dios hi bumoddang i hiyah

nunlumuwanah an namin. Ya umipa'amlonga' i hiyah binigat yaden athidin ha"on an nanongnan mun'am'amlonga' hi nihaggonanan ha"on. ³¹Ya ongal boy pun'amlonga' hinan lutan limmuna an namamah nadan tatagun nunhituhdi.

³²Ya alyon bon nan e anomnoman di, Da'yun imbabale' ya maphod di donglona' i da'yu ya unudonyu nan pangat'u ta mipa'amlong ayu. ³³Ya tigonyu ta igongahanyu nadan tugun'u ta adiyu iwalong ta wan manomnoman ayu. ³⁴Te mipa'amlong nan tagun manginaynayun an mundongol hi tugun'u ta abigabigat on nundadaan an mi'happitan i ha"on. ³⁵Te nan tagun mangakhup i ha"on ya inakhupana boy pi'taguwana i Apu Dios. Ya ma"amlong hi Apu Dios i hiya. ³⁶Mu nan tagun agge naminhod i ha"on ya hayadolnay inakihana. Te an namin nadan agge naminhod i ha"on ya hay atey mihmihhod i dida.

9 ¹Nan e anomnoman ya umat i ha nangiyammah balenan pituy^c tu"udna. ²Ta hidin nagibbuh ya ninomnoman mumpahamul ta indadaana nadan makan ya ma'inum. ³Ot honagona nadan binabain baalna ta eda mun'ayag hi umalin mi"an ot umedah nan na'abbaktu i diyen boble ot eda mun'ayag ⁴an alyonday, An namin ayun agge nanomnoman ya umali ayuh nan punhamulan. ⁵Te dakol di nidadaan hi makan ya ma'inum. ⁶Hanat idinongyu nadan pangat di agge nanomnoman ta mipto' di pangatu ta wan maphod di nitaguwanyu.

Nan Nanomnoman An Tagu Ya Mabalin An Papahiw

⁷Hanan mangihingal hinan ma'ammahiw an tagu ya hiya ot boy mipadngolan. Ya atbohdih nan adi maphod di pangatna an onaot pahakitan nan mangihingal i hiya. ⁸Ot hiya nan adim ipatnan pahiwon nan ma'ammahiw te ahiawan da'an hiya. Mu nan nanomnoman an tagu ya ihingalmu'eh nan ibahhawana ya pohpohdon da'a otahan. ⁹Te itudduwam'e nan nanomnoman an tagu ya bumoddang i hiya ta iy'al'alan manomnoman. Te nan athidin maphod di pangatnan tagu ya nan itugunmu i hiya ya middum hinan innilana tuwali.

¹⁰Nan waday takutna i Apu Dios ya hidiyey hipun di ena anomnoman. Te nan tagun innilanay a'at Apu Dios ya hiyay nanginnilah nipto'. ¹¹Ot nan nanomnoman an tagu ya dukkey pi'taguwanah tun luta. ¹²Nan nanomnoman ya waday maphod an gun'udona. Mu nan ma'ammahiw an tagu ya holtaponay punligatan.

¹³Nan tagun paddungnay ma"id ha nomnomna ya nipaddung hinan babain adina ono'nongan di hapitona ya aggena innilan bumain te ma"id tuwali ha in'innilana. ¹⁴Ya impa'inghanan e umbun hinan way panton di balena an nipattuk hinan nabaktu i diyen boble. ¹⁵Ta kumpulnan munla"uh

^c 9:1 Nan pitu hinan Biblia ya hay pinhodnan ibaga ya ma"id ha adi maphod hi middum.

an ta'on on padutu'anan umeh nan pangayana on pun'ayaganan ¹⁶alyonay, Dumagguh'ah tun bale'. ¹⁷Nan akawon an liting ya maphod hi panginuman. Ya athidi boh nan makan an impohpohodna hi'on ipa'pa"eh panganan.

¹⁸Mu agge innilan diyen tagun hanan hunggopanahdiy lummuuh atayana ta middum hinadan udum an nabaliyan an nun'a'ate.

Hay Tugun Solomon

10 ¹Datuwe nadan udum an tugun Solomon.

Nan nanomnoman an imbabale ya umipa'amlong hinan hi amana mu nan paddungnay ma"id ha nomnomna ya hiyay gapunah inomnoman nan hi inana.

²Nan kinadangyan an kuluk di na'alana ya ma"id ha idatnah iphodan. Mu nan nipto' di na'alana ya hidiyey mamalodpod hinan taguh atayana.

³Hi Apu Dios ya adina iyabulut an ma'agangan nan tagun maphod di pangatna mu nan adi maphod di pangatnan tagu ya adina idat nan gagamagamana.

⁴Nan humigan muntamu ya hiyay lummuuh awotwotana. Mu nan mahlun muntamu ya kumadangyan. ⁵Ya nan nanomnoman an imbabale ya idadaanay anonah nan ahitulu. Mu nan imbabale an ta'on on ahitulu on attaonan malmallo' ya umipabain.

⁶Nan tagun nipto' di pangatna ya mawagahan. Mu nan panapit nan tagun adi maphod di pangatna ya panophopnah a'at di bungotna.

⁷Nan tagun maphod di at'attona ya nanongnan nomnomnoman di tataguy amaphodna. Mu nan adi maphod di at'attona ya lo'tat ya malingling hidiyen tagu.

⁸Nan nanomnoman an tagu ya abulutonay mitugun i hiya ya un'unudona mu nan tagun paddungnay ma"id ha nomnomna an manuy hapitona ya hiya ya binahbahnay nitaguwana.

⁹Nan tagun nipto' di pangatna ya ma"id ha tumakutana. Mu nan kuluk di at'attona ya lo'tat ya ma'innilaan nan adi maphod an a'atna.

¹⁰Nan tagun amod on mungkodyat ya hiyay lummuuh waday mun'a"awit. Ya nan pamaagnah hapihapit ya hidiyey lummuuh adadagana.

¹¹Nan hapiton nan nipto' di pangatnan tagu ya umat hinan obob an mangdat hi itaguwan mu nan panapit nimpem nan tagun adi maphod di pangatna ya panophopnah a'at di bungotna.

¹²Nan ma'ahihhiwoh ibbanan tagu ya hiyay lummuuh pun'a"awitan mu nan tagun waday pamhodna ya linglingonay nibahhawan di ibbana.

¹³Nan nanomnoman an tagu ya ma'innilah nan hapitonan mu nan tagun agge nanomnoman ya mahapul an matitilog.

¹⁴Nan nanomnoman an tagu ya iha"adnah nomnomna nan ada'adalona mu nan tagun paddungnay ma"id ha nomnomna ya nan hapitonay lummuuh agagga ya nadadag.

¹⁵Nan kadangyan ya mabalin an pumbaliwna nan kinadangyana an umat hinan binattun alad an hiay pumbaliw nadan tatagun bimmoblehdi. Mu nan nawotwot ya adina abalinan an ihwang diadolna te gapuh nan ama'ma"idana i hiya.

¹⁶Hay gunggunaon nan nipto' di pangatnan tagu ya nan ena itaguwan mu nan adi maphod di pangatnan tagu ya hidiyey lummuh adusaana. ¹⁷Ya atbohdi hinan tagun donglonay mitugun i hiya ya hiay maphod di ena pi'taguwan. Mu nan adina pohdon an mihingal hinan nibahhawana ya hidiyey gapunah adi maphod di pi'taguwan.

¹⁸Nan tagun ipa'pa"enay hihiwonah ibbana ya ma'alayyah. Ya nan amod on hay ibbanay ena tumtumbu'on ya paddungnay ma"id ha nomnomna.

¹⁹Nan dakol di hapitona ya wadan waday mibahhoh hapitona mu nan nanomnoman an tagu ya ono'nonganay hapitona.

²⁰Nan maphod di nomnomnan tagu ya mipaddung nan hapitonah nan namahmah an silber. Mu nan tagun adi maphod di nomnomna ya ma"id ha hunung nan hapitona. ²¹Ya atbohdi an nan nipto' di pangatnan tagu ya dakolday maboddangan hinan hapitona. Mu adi athidih nan tagun paddungnay ma"id ha nomnomna te pamaag ya nan a'atnay lummuh atayana.

²²Hay mangipakadangyan hi udum an tatagu ya nan wagah Apu Dios an adi ma'udman hi inomnoman.^d

²³Nan tagun paddungnay ma"id ha nomnomna ya mun'am'amlong an mangat hinan adi maphod. Mu nan tagun nanomnoman ya mun'am'amlong hi nanginnilaanah nan nipto' an pangat.

²⁴Ya nan tumakutan nan tagun adi maphod di pangatna ya hiay mipa'annung mu nan tagun nipto' di pangatna ya mipa'annung nan pohdonan ma'at. ²⁵Ot nan ay puwo' an dumatong hi nitaguwan nan adi maphod di pangatna ya hidiyey lummuh adadagana. Mu adi athidih nan nipto' di pangatna te nanonganay ipapto' Apu Dios.

²⁶Onha nan humigan tagu di puntamuwon ot umipahiga ahan an umat hinan mangulipot an umalinu onu nan ahuk an mumpait hi mata.

²⁷Nan waday takutna i Apu Dios ya mabalin an madukdukkey pi'taguwana mu nan adi maphod di pangatna ya mabalin an hidiyey lummuh agagga ya nate.

²⁸Hay namnamaon nadan tatagun nipto' di pangatda ya nan eda umamlongan mu hay namnamaon nan adi maphod di pangatna ya adi ma'at. ²⁹Te hi Apu Dios ya ipappapo'na nan tagun nipto' di pangatna mu dadagona nan adi maphod di at'atona. ³⁰Ot nan tagun nipto' di pangatna

^d **10:22** Nan adi ma'udman hi inomnoman ya hay alyon di udum an Biblia ya adi gapuh hinlu.

ya mipapto' nimpe mu nan adi maphod di pangatna ya adi madney iha"adanah nan numboblayanda. ³¹ Ya nan nipto' di pangatnan tagu ya mapto' hinan hapitona an hiya ya nanomnoman mu nan tagun hapitonay agge immannung ya lo'tat ya duminong. ³² Nan hapiton nan tagun nipto' di pangatna ya waday iboddangnah nan mangngol mu nan tagun adi maphod di pangatna ya bumahbah nan hapitona.

11 ¹ Hi Apu Dios ya ongal di aggenna naminhodan hinan kuluk di atonan mungkiluh nan inginana mu umipa'amlong i hiya nan nipto' di pungkiluna.

² Nan lattuwag ya hiyay lummuhi ipada"ulan. Ot nan tagun mumpada"ul ya hiyay immannung an nanomnoman.

³ Nan maphod di pangatnan tagu ya halipodpodona ta ma"id ha kuluk hi atona. Mu nan kuluk di pangatna ya hiyay lummuhi adadagana.

⁴ Nan kinadangyan diohan tagu ya ma"id ha iboddangna hi'on nadatngan di punhumalyaan Apu Dios hinadan tatagu. Mu nan pangatan diohan taguh nan miyunudan hinan pohdon Apu Dios di mangihwang i hiyah ate. ⁵ Ya nan nipto' an pangat ya ongal di iboddangnah nan nitaguwan nadan mangat hinan pohdon Apu Dios. Mu nan adi maphod di pangatna ya hidiyey lummuhi adadagana.

⁶ Nan nipto' an pangat diohan tagu ya hiya boy mangihwang hi ena adadagan. Mu nan adi maphod an at'atton diohan tagu an umat hi omno ya hiyay lummuhi paddungnay aknaana. ⁷ Wa'et mate nan adi maphod di pangatna ya mi'yaten hiya nan gagamgamanan kinadangyan ya an namin an abalinana ya ma"id ha hilbina. ⁸ Mu nan nipto' di pangatnan tagu ya mihwang hinan dakol an ligat an ma'ma'at hinan adi maphod di pangatna.

⁹ Ya nan hapiton nan ma"id ha pangibilangna i Apu Dios di mama"ih nan hinaggona. Mu nan nipto' di pangatna ya innilanay atona ta mihwang.

¹⁰ Ya wada'ey maphod an na'at hinan nipto' di pangatnan tagu ya mi'yam'amlong nadan ibbanan bimmoble. Ya atbohdin onha mateda nadan adi maphod di pangatda ot itkukday pun'am'amlonganda.

¹¹ Nan ohan boble ya mabalin an pumhod an gapuh dasal nadan tatagun nipto' di pangun'unudda. Mu hay lummuhi adadagan diohan boble ya nan hapiton nadan nunhituhdin adi maphod di pangatda.

¹² Nan agge nanomnoman ya ngohayonay hinaggona mu adi athidih nan nanomnoman te ono'nonganay hapitona.

¹³ Nan tagun amod on hay ibbanay ena tumtumbu'on ya ta'on on nan unhaot adi mipa'innilah udum on enaot nun'ibagah nan tatagu. Mu nan na'unud an tagu ya adina ibagah udum nan lebbengnan adi mipa'innila.

¹⁴ Nan boblen ma"id ha mangitudtuduh maphod ya nalakan madadag mu nan boblen dakolday mangitudtuduh maphod ya naligat an madadag.

¹⁵ Nan tagun mangihapit i ha umutang an aggena in'innila ya muntutuyuh umudi. Mu nan adina pohdon an hiyay mangihapit i ha umutang ya ma"id ha ahina inomnoman.

¹⁶ Nan babain ma'uley pangije"ena ya waday pamiyal di tatagun hiya. Mu nan mabungot an lala'i ya ammunan kinadangyanan wadan hiya. ¹⁷ Te nan ma'ulen tagu ya pummaphodanah diyen a'atna. Mu nan mabungot an tagu ya dadagonay nitaguwana. ¹⁸ Ya atbohdih nan adi maphod di pangatnan tagu an ma"id ha maphod hi pumbalinan di bo'laona. Mu nan mangat hinan nipto' ya waday maphod an gunggunana. ¹⁹ Ya atbohdih nan tagun nan nipto' di inaynayunan aton ya hiyay maphod di itaguwana. Mu nan manginaynayun an mangat hinan adi maphod ya hidiyey lummuh atayana. ²⁰ Te nan kuluk an pangat ya umipabungot i Apu Dios mu mipa'amlong i hiya nan mangat hinan miyunnudan hinan pohdona. ²¹ Ot nan tagun adi maphod di pangatna ya adi mibahhoy pundusaan Apu Dios i hiya. Mu nan nipto' di pangatna ya adi dusao Apu Dios.

²² Nan apgohan an babain ma"id ha nomnomna ya nipaddung hinan balitu' an singsing an nitabikoh nan hungil di babuy.

²³ Nan gagamgaman nan nipto' di pangatnan tagu ya maphod di pumbalinana. Mu nan adi maphod di pangatnan tagu ya hiktamanay bungot Apu Dios i hiya.

²⁴ Nan tagun ma"id ha ukuhnan mangdat ya ma'ud'udman di kinadangyanan mu nan ma"ukuh an mangdat hi iboddangna ya mamammaman mawotwot. ²⁵ Te nan ma"id ha ukuhnan mangdat ya pumhod di nitaguwana. Ya nan bumoddang hi ibbana ya ahi damdama bo maboddangan.

²⁶ Ya nan mungnginah boga an ta'on on waday ngumina on adina te ihhodnah nguminaana ya idutan di tatagu. Mu ongal di punhanaan di tataguh nan tagun mungnginah boga ta mabalin an waday nguminaan di tataguh anonda.

²⁷ Nan tagun atonay abalinana ta nan maphod di ma'at ya waday pamiyal di tatagun hiya. Mu nan tagun nan adi maphod di ena hamhama"on ya nan adi maphod boy akhupana.

²⁸ Ya nan tagun hanan kinadangyanay pundinolana ya lo'tat ya ay nalangun tubun magah. Mu nan nipto' di pangatnan tagu ya hiyay nanongnan mawagahan ta umat hinan manguyho' an tubu.

²⁹ Nan tagun amod on mangdat hi inomnoman di pamilyana ya hiyay ma"id ha gunggunanah umudi. Ya nan tagun paddungnay ma"id ha nomnomna ya mumbalin hi baal nan nanomnoman an tagu. ³⁰ Hay pumbalinan nan nipto' di pangatnan tagu ya umat hinan bungbunga'an an mangdat hi itaguwan ya atbohdi an nan nanomnoman an tagu ya boddanganay udum an tagu ta kumulugdan Apu Dios. ³¹ Hi Apu Dios ya

adina ibahhon mangdat hi gungganan nan tagu an mangat hinan nipto' hi ad uwanin awadanah tun luta. Ot namama moy pundusaanah nan tagun adi maphod di pangatna.

12 ¹Nan tagun pohdonan matugun ya hidiyey panginnilaan an pohdonan matudduwan. Mu nan adina pohdon an patugun ya paddungnay ma"id ha nomnomna.

²Nan maphod di pangatnan tagu ya umipa'amlong i Apu Dios. Mu nan amod on nan nibahhoy nonomnomonah atona ya dusao Apu Dios.

³Nan nipto' di pangatnan tagu ya umat hinan kayiw an agge nalaka an maba'gut mu nan adi maphod di pangatna ya ma"id ha ena ihamadan.

⁴Nan ud ahawah nan babain maphod di pangatna ya mapemanan. Mu nan babain amod ona bainon hi ahawana ya nipaddung hinan dogoh an manadag i ahawana.

⁵Nan tagun nipto' di pangatna ya nan maphod an ma'at hi ibbanan tagu di nomnomnomona mu nan adi maphod di pangatnan tagu ya nan layah di itugunah ibbanan tagu. ⁶Te hay atona ya ibaganay layah ta pamatayanah nan ibbana. Mu nan maphod an tagu ya nan bumoddang hi ibbanay ibaganaya.

⁷Nadan adi maphod di pangatda ya mabahbaha ta lo'tat ya ma"id ha mabati i dida. Mu nan hina'amman maphod di pangatda ya minaynayun di punholagan nadan tanudanda.

⁸Nan nanomnoman an tagu ya maphod di ibagan di tagu i hiya. Mu nan nakutikut di nomnomna ya adi ibilang di tatagu.

⁹Udu'dulna bo nan nawotwot mu ta mahlun muntamu ta waday anona mu hanan ipatigonan ay nabaktuy ataguna mu dee mannot an ha anona on mi'anuh.

¹⁰Nan nipto' di pangatnan tagu ya maphod di pangipapto'nah nadan animalna. Mu nan adi maphod di pangatnan tagu ya adi bo maphod di pangatnah nadan animalna.

¹¹Nan mahlun e muntanom ya mahawwalan di itanudna. Mu nan ma"id ha nomnomnan tagu ya nan ma"id ha hunungnay ahiwana.

¹²Hay gagamgaman nadan adi maphod di nomnomda ya nan kinadangyan nadan udum mu nan maphod an tagu ya adi athidi te minaynayun nan maphod an pangatna. ¹³Nan adi maphod di nomnomnan tagu ya nan hapitonan agge immannung di manadag i hiya. Mu adi athidiy ma'at hinadan mangat hinan pohdon Apu Dios. ¹⁴Te hay midat hi hinohhan tagu hi ayna gungguna ya nan miyunudan hinan hapitona ya pangatna.

¹⁵Nan tagun hay punnomnomna ya nipto' an namin nan at'atona ya paddungnay ma"id ha nomnomna. Mu nan tagun igongahanay mitugun i hiya ya hiyay immannung an nanomnoman.

¹⁶Nan paddungnay ma"id ha nomnomna ya nalakan bumungot ya ma'apto' bo udot. Mu nan tagun nanomnoman ya ta'on hi alinah ba'bainonda ya namaag ya dindinnongan.

¹⁷Nan maphod an muntistigu ya nan immannung di ibagana ta nalakan ma'innilaan nan bimmahul ta hiyay madusa. Mu nan munlayah an tagu ya layah boy puntistiguna.

¹⁸Wadaday udum an tatagun ay matadom an hinalung di hapitondan humugat. Mu nan hapiton nan immannung an nanomnoman ya ay agah an waday iboddangna. ¹⁹Hi'on immannung nan hapiton ya nanongnan nomnomnomon nadan tatagun nangngol mu onha layah nan hapiton ot adi madne ya ma'innilan agge immannung.

²⁰Nadan adi maphod di nomnomnomondah atonda ya adi maphod tuwaliy nomnomda mu nan hay nonnomnomonda ya hay luminggaian ya diday waday amlongda. ²¹Te nadan mangat hinan pohdon Apu Dios ya adida madadag mu nadan adi maphod di pangatda ya minaynayun di punligatanda.

²²Nadan munlayah an tagu ya umipabungotda i Apu Dios mu nan immannung di hapitona ya umipa'amlong i hiya.

²³Nan nala'ing an tagu ya adina ilattuwag nan innilana mu nan paddungnay ma"id ha nomnomna ya namaagnah hapit hinan ma"id ha hunungna.

²⁴Nan mahlun muntamu ya mabalin an hiyay mun'ap'apu mu nan ma'higa ya mumbalin hi himbut.

²⁵Nan inomnoman ya ma"idonay amlong mu nan maphod an hapiton hi ibba ya umipa'amlong.

²⁶Nan mangat hinan pohdon Apu Dios ya maphod di panugunah nan ibbana mu nan adi maphod di pangatna ya hiyay lummuuh adadagan nadan ibbana.

²⁷Nan ma'higgan tagu ya adina ma'ala nan pohdona mu nan mahlun muntamu ya mabalin an bagiyona nan nun'abalol an kinadangyan.

²⁸Nan mangun'unud hinan tugun Apu Dios ya mi'taguh munnananong.

13 ¹Nan nanomnoman an imbabale ya wa'e ta iingal nan hi amanah nan nibahhawana ta atugunana ya donglona. Mu nan ma'ammahiw ya adina donglon di pangihingaldan hiya.

²Nan maphod di hapitonan tagu ya waday maphod an gunggunana. Mu nan tagun e bumalbali ya nan adi maphod di pohdonan ma'at an umat hi papatte.

³Nan tagun na'ono'nong di hapitona ya miyadawwih adi maphod an ma'at. Mu nan aggema innilan mangono'nong hi hapitona ya hiya ya binahbahnay nitaguwana.

⁴Nan humigan e muntamu ya ta'on hi nganney omnawana ya adi pa'ala. Mu nan mahlun muntamu ya abalinanan alan nan pinhodna.

⁵Nan nipto' di pangatnan tagu ya ongal di aggema naminhodan hinan layah. Mu nan adi maphod di nomnomna ya nan umipabain an bumahbah di amodna aton.

⁶Hay pumbaliw nan nipto' di pangatnan taguh nitaguwana ya nan pangatanah nan pohdon Apu Dios. Mu hay manadag hinadan udum an tatagu ya nadan adi maphod an at'attonda.

⁷Wadaday udum an hay ipatpatigoda ya ayda kadangyan mu onnot on ma'ma"idanda. Ya wadada boy udum an ipatigodan ay ma'ma"idan i dida mu onnot on diday kadangyan. ⁸Nan kadangyan ya mabalin an usalonay pihhuna ta mihwang hinan mamaten hiya. Mu nan nawotwot ya ma"id ha athidih itakutna.

⁹Nan maphod di pangatnan tagu ya nipaddung hinan mumbinang an dilag. Mu nan tagun adi maphod di pangatna ya umat hinan tuwen madop an dilag.

¹⁰Nan mumbaktun tagu ya nanongnan waday pi'yawwitna. Mu nan nanomnoman ya donglonay tugun nan ibbana.

¹¹Nan kinadangyan an kuluk di na'alaana ya nalakan mama"id. Mu nan nablayan an pihhu ya ma'ud'udman.

¹²Nan namnamaon diohan tagu ya onha ma"id ot nunhiglay hakit di nomnomna. Mu onha nipa'annung hidiyen namnamaona ot ongal di pun'amlongana an umat hinan bungbunga"an an mangdat hi itaguwan.

¹³Nan tagun ngohayonay mitugun i hiya ya hay hadhaddona ya hay adusaana. Mu nan tagun un'unudonay mitugun i hiya ya waday gunggunana. ¹⁴Te nan ituddun nan nanomnoman ya mangdat hi itaguwan an umat hinan litig an malpuh nan obob. Ot nan mangunud i diyen tudtudu ya mihwang hinan ena atayan.

¹⁵Nan tagun nanomnoman te imatunana nan nipto' ya nan nibahho ya maphod di pangibilang di tatagu i hiya. Mu nan adi dumngol ya maligatan hi nitaguwana.

¹⁶Nan nanomnoman ya pa'annomnomona on ahina aton di atona. Mu hana'en agge nanomnoman ya hiya ya impa'innilanay layahna.

¹⁷Hi'on nan ma'layyah an tagu di honagon ta hiyay e mi'hapit ot mamaman ma"id ha dumhana. Mu nan tagun mabalin an pundinolan ya innilanay atongan mangipanuh hi way miyahapit.

¹⁸Nan tagun adi patuddu ya mamaman mawotwot ta mibabain. Mu nan tagun donglonay mitugun i hiya hi'on waday nibahhawana ya hiyay mapemanan.

¹⁹Dita'un tatagu ya mun'am'amlong ta'u on mipa'annung nan pinhod ta'u. Mu nan paddungnay ma"id ha nomnomna ya adina ahan pohdon an du'gon nan pangatnan adi maphod.

²⁰Nan tagun hay pi'hayhayyupnana ya nadan nun'anomnoman ya lo'tat ya manomnoman. Mu nan tagun nan paddungnay ma"id ha nomnomnay nanongnah i'uyugana ya hanan punholholtapanay hadhaddona.

²¹Nan tagun hanan pumbahulan di impa'inghana ya ma"id ha dumhanah nan nitaguwana. Mu nan nipto' di pangatna ya maphod boy midat i hiyah gungunana.

²²Nan maphod an tagun waday odona ya nadan apapunay mamoltan. Mu nan odon nan tagun nabahulan ya midat hinadan tatagun nipto' di pangatna.

²³Nadan nun'awotwot ya ta'on on dakol di apitonda ya pulhon damdamian nadan adi maphod di pangatdan tatagu.

²⁴Nan ammod an ta'on on nibahhoy at'atton nan imbabalena on adina titilgon ta wan matugun ya ma"id ha pamhodna i diyen imbabalena. Mu nan pohpohdonay imbabalena ya titilgona ta matugun.

²⁵Nan tagun nipto' di pangatna ya adi makulangan hi anona. Mu nan adi maphod di pangatna ya makulangan hi anona.

14 ¹Nan nanomnoman an babai ya ipaphodnay nunhituwanda. Mu nan paddungnay ma"id ha nomnomnan babai an nibahhoy at'atona ya hiyay manadag hinan nunhituwanda.

²Nan tagun waday takutna i Apu Dios ya mipatigoh nan nipto' an pangatna. Mu nan tagun adi tumakut an mangat hinan nibahho ya pihulonah Apu Dios.

³Nan paddungnay ma"id ha nomnomnan tagun amod on munlattuwag ya hiyay abahahaha. Mu nan nanomnoman an tagu ya nan hapitonay mangihwang i hiyah nan adi maphod an ma'at.

⁴Wada'e ha nuwang hi mabikah an pun'aladuwon ya dakol di apiton mu ma"id'e ha nuwang hi pun'aladuwon ya oh'ohha ha apiton.

⁵Nan tagun impa'inghanan mangibagah immannung ya adi munlayah nan puntistiguwana mu nan adi maphod di pangatna ya layah di ibagana.

⁶Nan ma'ammahiw an tagu ya ma"id ha atongan manomnoman. Mu nan ma'awatana nan nipto' ya nalakan matuddawan.

⁷Adi'a mi'uyug hinan paddungnay ma"id ha nomnomnan tagu te ma"id ha ma'adalmun hiyah maphod.

⁸Nan nanomnoman ya nala'ing an tagu ya innilanay nipto' hi atona. Mu nan paddungnay ma"id ha nomnomnan tagu ya manuy hapitona. ⁹Ya atbohdin ta'on on pumbahulan di at'attona ya adi minomnoman. Mu nan nipto' di pangatnan tagu ya maphod di pi'hayhayyupanah tatagu.

¹⁰Nan tagun waday inomnomana ya hiya ya abuh di nanginnilah nan a'atna ya atbohdih nan waday pun'amlongana an hiya ya abuh di munli'n'a.

¹¹Nan nunhituwana nan tagun adi maphod di pangatna ya madadag mu nan tagun maphod di nomnomna ya mihamhamad di nunhituwana.

¹²Hay punnomnom di udum an tatagu ya maphod di at'attonda mu hay umudi ya hidiyen at'attonda ya hidiyey lummuh ihi'ananda i Apu Dios.

¹³Nan umukayungan ya ta'on on ingihngihilna ta adi ma"aptō' mu hay nomnomna ya wahdi damdamian adi ma'aan.

¹⁴Hay mipabangngad hinan tagun immadawwi i Apu Dios ya nan miyunnduan hinan adi maphod an ina'inatna. Mu nan maphod di at'attona ya maphod boy mipabangngad i hiya.

¹⁵ Nan agge nanomnoman an tagu ya nalakan mihapitan an ta'on on nibahho. Mu adi athidih nan nanomnoman an tagu te pa'annomnomona hi'on nipto' on ahina unnudan.

¹⁶ Nan nanomnoman an tagu ya halipodpodonay atona ta wan miyadawwih nan adi maphod an ma'ma'at. Mu adi athidih nan tagun paddungnay ma"id ha nomnomna te kumpulnan mipanomnom on na'ibagonan inat.

¹⁷ Nan tagun hi kittang on bimmungot ya dakol di mibahhoh atona. Ya atbohdin humihiwoday tatagun hiya te nan athidin pangatna.

¹⁸ Hay magun'ud nan agge nanomnoman ya nan miyunnduan hinan ato'atonan ma"id ha hunungna. Mu nan nanomnoman an tagu ya ma'ud'udman nan innilana.

¹⁹ Nan adi maphod di pangatnan tagu ya ahi e mumpahpahmo' hinan nipto' di pangatnan tagu.

²⁰ Nan nawotwot an tagu ya adi pohdon di tatagu an ta'on on nan hinaggona. Mu nan kadangyan ya hiyay dakol di gagayyumna.

²¹ Nan pamihulan hi ibban tagu ya bahul mu nan ma'uleh nadan mahmahmo' an tatagu ya mipa'amlong.

²² Nan tagun nan maphod di nomnomnomonah aton ya hiyay pohpohdon di tatagu ya waday dinoldan hiya. Mu nan tagun nan adi maphod di nomnomnomonah aton ya hidiyey lummuh adadagana.

²³ An namin nadan muntamu ya waday bo'laondah itanudda. Mu nan tagun manuy hapitna on adi muntamu ya lo'tat ya makulangan hinan mahapulna.

²⁴ Nan nanomnoman an tagu ya nan kinadangyanay gunggunana. Mu nan paddungnay ma"id ha nomnomna ya mundingngol an gapuh nan ama"id ha nomnomna.

²⁵ Onha nan tistigu ya nan immannung di ibagana ot hiyay ay manandih amoltaan nan tagun ma"id ha bahulna. Mu nan munlayah an tistigu ya hiyay mangilumlum hi ibbana.

²⁶ Nan tagun waday takutna i Apu Dios ya hidiyey mangdat hi nahamad an dinolna ya hay adina punduwaduwaan hinan pangipapto' Apu Dios i hiya ya nan pamilyana.

²⁷ Ya atbohdin nan waday takutna i Apu Dios ya waday pi'taguwana an umat hinan litig an malpuh nan obob ya miyadawwih nan lummuh ena atayan.

²⁸ Nan patul an dakol di tataguna hinan pun'ap'apuwana ya hidiyey pun'amlongana mu nan ap'apun oh'ohhay tataguna ya lo'tat ya madadag nan pun'ap'apuwana.

²⁹ Nan nanomnoman an tagu ya adi hi kittang on bimmungot. Mu nan hi kittang on bimmungot ya hidiyey atiganan paddungnay ma"id ha nomnomna.

³⁰Nan tagun waday linggop di nomnomna ya maphod boy li'nan diadolna. Mu nan tagun ma'amoh ya lo'tat ya ngupuhon di amohnay adolna.

³¹Nan mamalpaligat hinadan nun'awotwot ya hi Apu Dios an nunlumu i dida di ayna ngohayon. Mu nan tagun waday homo'nah nadan nun'awotwot ya hi Apu Dios di dayawona.

³²Nan tagun adi maphod di at'atona ya hidiyen at'attonay manadag ihiya. Mu nan nipto' di pangatnan tagu ya ta'on on alinah mate ya waday dinolnah nan pangipapto' Apu Dios i hiya.

³³Nan tagun innilanay nipto' ya nan nibahho ya hiyay immannung an nanomnoman. Mu nan paddungnay ma"id ha nomnomna ya adi athidi.

³⁴Nan boblen maphod di pangat nadan bimmoblehdhi ya mundongol nan numboblayanda. Mu nan boblen nadan umipabain di at'atton nadan tataguahdi ya mipada"ulda.

³⁵Nan ap'apu ya ongal di pun'amlonganah nadan puntamuwonan maphod di atondan muntamu mu nunhiglay pundusanah nan umipabain di at'attona.

15 ¹Nan ma'ma'ulley pambalnah nan bimmohol ya hidiyey mangaan hinan bungotna. Mu bumubbungo'e bo tuwalin mambal ya mamama.

²Nan nanomnoman an tagu ya dakol di ma'adal hinan ibagana. Mu nan paddungnay ma"id ha nomnomnan tagu ya ma"id ha hunung nan hapiton.

³An namin di ma'ma'at ya tigtiggon Apu Dios ot innilana nadan mangmangngat hi nipto' ya nan adi maphod di pangatna.

⁴Nan ma'ulen hapit ya paddungnay bungbunga'an an mangdat hi itaguwan. Mu nan hapiton an adi maphod ya umipahakit hi nomnom.

⁵Nan tagun ngohayonay tugun nan hi amana ya paddungnay ma"id ha nomnomna. Mu nan donglonay tugun ya hiyay nanomnoman.

⁶Nan tagun nipto' di pangatna ya munnanong nan kinadangyanu mu nan bo'laon nan adi maphod di pangatnan tagu ya hidiyey gumapuh inomnomana.

⁷Nan hapiton nan nanomnoman an tagu ya waday ma'adal mu adi athidih nan hapiton nan paddungnay ma"id ha nomnomna.

⁸Nan dasal nadan tatagun nipto' di pangatda ya umipa'amlong i Apu Dios. Mu nan tagun adi maphod di pangatna ya umipabohol i Apu Dios nan i'nongnan hiya. ⁹Ya ta'on on nan pangkiye'en nan adi maphod di pangatnan tagu ya umipabohol bo i Apu Dios. Mu pohpohdona nan tagun nan nipto' di pohdonan aton.

¹⁰Nan tagun adina unudon nan innilanay maphod an pangat ya nunhiglay panitilog Apu Dios i hiya. Ya nan tagun ma'abbungot hinan pangihingalandan hiya ya hidiyey lummuh atayana.

¹¹ Hi Apu Dios ya ma"id ha mabalin hi mipa"e i hiya ta adina innilaon an ta'on on nan awadan di nun'a'ate. Ot namama mo ahan nan wah nomnom di tatagu.

¹² Nan ma'ammahiw an tagu ya aggema pinhod an waday muntugun i hiya ta ta'on on nadan nanomnoman ya adi mumpatuddu i dida.

¹³ Nan waday amlongnan tagu ya mapto' hi angahna an umat hinan umukayungan an matigon ma"id ha amlongna.

¹⁴ Nan immannung an nanomnoman ya adi umenglen mun'adal. Mu nan paddungnay ma"id ha nomnomna ya iyamlongna nan ma"id ha hunungnan innilana.

¹⁵ Nan minomnoman an tagu ya ma"id ha pohodnah nan nitaguwana. Mu nan tagun amod on mun'am'amlong ya adi umengleh nitaguwana.

¹⁶ Nan nawotwot an tagu an waday takutna i Apu Dios ya hiyay udu'dul mu nan tagun ma"id ha pohod di nitaguwana an ta'on on ongal di kinadangyana. ¹⁷ Ya udu'dul boy ta'on on ammuna ha nating i ha ihda mu ta mun'u'ullayanta mu hanan maphod di ihdan umat hi dotag mu onta ay numbubuhhulan an mangen.

¹⁸ Nan tagun mabambannungot ya lummuhi punhahannuwan di tatagu. Mu nan na'anus an tagu ya padinonganay mun'a"awit.

¹⁹ Nan ma'ahiggan muntamu ya maligatan hinan nitaguwana. Mu nan nipto' di pangatnan tagu ya manghan di ligat hinan nitaguwana.

²⁰ Nan nanomnoman an imbabale ya waday pun'amlongan nan a'ammmodnan hiya. Mu nan paddungnay ma"id ha nomnomna ya pihilunan a'ammmodna.

²¹ Nan agge nanomnoman ya mun'am'amlong hinan ma"id ha hunungnan at'attona. Mu nan nanomnoman ya nan nipto' an pangat di inaynayunan aton.

²² Nan tagun donglonay maphod an tugun nadan nun'anomnoman ya maphod di pumbalinan nan ninomnomnan aton mu nan adina donglon di tugun nadan nanomnoman ya adi maphod di pumbalinan nan ninomnomnan aton.

²³ Nan tagun maphod di pambalnah nan mahmahanda ya waday amlongna an namamah on waday iboddangnah nan nangngol.

²⁴ Nan tagun immannung an nanomnoman ya nan nahamad an pi'taguwan di gagamgamana an bokon nan ihi"ananan Apu Dios hi inggana.

²⁵ Nan mumbaktun tagu ya dadagon Apu Dios di nunhituwana mu ipapo'na nadan nun'apuhig ta ma"id ha mangidoldol hinan pogpog nan nipaboltan i didan luta.

²⁶ Nan adi maphod an punnomnom ya umipabungot i Apu Dios mu nan ma'ulen hapit ya umipa'amlong i hiya.

²⁷ Nan na'agum an tagu ya hiyay mangdat hi inonoman di pamilyana. Mu nan tagun adina iyabulut an mabayadan ta atonay nibahho ya malinggop di nitaguwana.

²⁸ Nan maphod di pangatnan tagu ya an namin di mibagan hiya ya nomnomnomona ni' on ahina tobalon. Mu nan adi maphod di punnomnomna ya namaagnah hapit ta hiya nan waday adi maphod hi hapitona.

²⁹ Hi Apu Dios ya donglonay dasal nan nipto' di pangatnan tagu. Mu du'gona nan tagun adi maphod di pangatna.

³⁰ Nan ma"apngan tagu ya umipa'amlong hi ibbana an umat hinan maphod an hubud an maphod di li'nah pangngolan.

³¹ Nan tagun abulutonay tugun i hiyah nan nibahhawana ya hiyay mibilang hiohan nanomnoman. ³² Mu nan tagun aggena pinhod an matudduwan ya hayadolnay dinadagna. Mu nan papahiw ya lo'tat ya manomnoman.

³³ Nan waday takutna i Apu Dios ya hiyay lummuh anomnomana. Ot nan tagun pohdonan mipabaktu ya gahin on mumpada'ul.

16 ¹ Hay tagu ya mabalin an hiyay munnomnom hi atona. Mu gahin di hi Apu Dios damdamay mangiyabulut ya ahi mipa'annung.

² Hay punnomnom diohan tagu ya nipto' an namin nan at'atona. Mu hi Apu Dios ya innilana nan wah nomnomna.

³ Iyukodmu i Apu Dios an namin nan nomnomnom an aton ot maphod di pumbalinana.

⁴ An namin an winadan Apu Dios ya waday ninomnomnah iyatanda ta hiya nan ta'on on nan tagun adi maphod di pangatda ya mun'appitdah madusa.

⁵ Nan mangipabaktuhadolna ya ongal di bungot Apu Dios i hiya ta adi mibahhoy pundusaanan hiya.

⁶ Mu nan tagun nanongnay pamhodna ya pundinolna i Apu Dios ya linglingonay numbahulana. Te nan tagun waday takutna i Apu Dios ya adina aton nadan adi maphod.

⁷ Ya umipa'amlong'e i Apu Dios di pangat diohan tagu ya ta'on on nadan binuhulna ya paphodon Apu Dios di punnomnomda ta wan maphod di pi'hayyupandan hiya.

⁸ Udu'dulna nan kittang di pihhu mu ta nipto' di nalpuwana mu nan ongal di pihhu yaden hay na'alaana ya nalpuh kuluk.

⁹ Hay tagu ya mabalin an hiyay munnomnom hi atona. Mu hi Apu Dios di mabalin an mangipa'annung i dadiyen ninomnomnan aton.

¹⁰ Nan abalinan nan patul ya hi Apu Dios di nalpuwana ot mahapul an nipto' di atonan mumpapto' ya mangipanuh hi tatagu.

¹¹ Nan kiluwan di mingina ya adi pohdon Apu Dios an waday kuluk hi midmiddum.

¹² Nadan patul ya adida pohdon nan adi maphod an pangat te hay pumbikah di pumpapto'anda ya nan nipto' an pangat. ¹³ Ya hay umipa'amlong i dida ya nan tagun immannung di hapitona.

¹⁴ Mu wa'e ta bimmungot nan patul ya waday mate. Mu nan nanomnoman an tagu ya innilan mangalubyag hinan patul ta ma'aan di bungotna. ¹⁵ Te mipa'amlong'e nan patul ya ongal di ma'iboddangnah nadan tatagun umat hinan udan an taguwonay nitanom.

¹⁶ Udu'dul nan e anomnoman ya nan panginnilaan hinan nipto' mu nan e pangamungan hi silber ya balitu'. ¹⁷ Te nan nipto' di pangatnan tagu ya innilan mi'adawwihi nan adi maphod di at'attona. Ot nan mangathidi ya hay adolnay impapto'na. ¹⁸ Mu nan pumbaktuwan ya hiyay lummuuh adadagan ya atbohdih nan punlattuwagan an hiyay lummuuh ipada"ulan. ¹⁹ Udu'dulna nan mumpada"ulta an ta'on on midmiddumta nadan nun'awotwot mu nan eta midmiddum hinadan mumpumbaktu ta mi'godgodwatah nan kulukonda.

²⁰ Nan tagun un'unudona nan mituddun hiya ya mipaphod di nitaguwana. Ya atbohdin mipa'amlong nan tagun nanongnan hi Apu Dios di pundinolana.

²¹ Nan nanomnoman an tagu ya abalinanan mangimatum hinan nipto' ya nan nibahho. Ya atbohdin umipa'amlong di hapitona ta hiya nan pohdon di tatagun donglon. ²² Te nan e anomnoman diohan tagu ya hiyay lummuuh ipaphodana ta umat hinan obob an adi matmatdu'. Mu nan paddungnay ma"id ha nomnomnan tagu ya madusah nan nalgom an pangatna.

²³ Nan nanomnoman an tagu ya pa'annomnomona on ahi humapit ta hiya nan maphod hi pangngolan nadan tatagu.

²⁴ Nan ma'ulen hapit ya mi'alig hinan danum di iyukan an maphod hi pangngolan ya ipaphodnay punli'na.

²⁵ Hay punnomnom di udum an tatagu ya maphod di at'attonda mu aggeda innila an hidiyey lummuuh ihi'ananda i Apu Dios.

²⁶ Hay mangigalid hi tagu ta ilaputnan muntamu ya nan inagangna.

²⁷ Nan tagun adi maphod di pangatna ya amod on hay ena pamahbahan hi ibbana di minonomnom i hiya ya atbohdih nan hapitona an ay apuy an gumhob. ²⁸ Ya amod on hay ibbanan taguy ena tumtumbu'on ta hidiyey lummuuh abahbahan di maphod an punhahayyupan di tatagu. ²⁹ Nan mabungot an tagu ya ha'ulonay ibbanan tagu ta atonday adi maphod.

³⁰ Nan mangokodyat an tagu ya nat'on di pun'imihna te na'innilan waday adi maphod hi pohdonan aton.

³¹ Hay magun'ud hi pangatan hinan miyunnuhan hinan pohdon Apu Dios ya adukkey pi'taguwan hitun luta. Ya nan ubana ya hidiyey itigan di amaphodnan tagu.

³² Udu'dulna nan tagun na'anus an adi hi kittang on bimmungot mu nan tagun ongal di abalinanan mangubat hi boble ya sinakupna.

³³ Hayohan aton di tatagu ya ibunutda nadan ninomnomda ta mapto' on nganney atonda mu hi Apu Dios damdamay ukod hinadan ma'at.

17 ¹Udu'dulna nan ta'on on kulang di anon mu malinggop di nunhituwan mu hanan dakol di makan ta mabalin an munhidata mu namaaggon nanongnay punhahannuwan.

²Nan nanomnoman an baal ya lo'tat ya hiyay nabakbaktu mu nan umipabain di at'atonan imbabalen nan ud baal i hiya te waday pi'imboboltana.

³Hay pangitigan an immannung an silber onu balitu' ya nan pangipadalanandah nan apuy mu hi Apu Dios ya hay panitiganah on maphod onu adi maphod di a'at ta'u ya hinan nomnom ta'u.

⁴Nan adi maphod di pangatnan tagu ya pohpohdonan dongdonglon nan adi maphod an hapiton nadan ibbana. Ya atbohdih nan munlayah an tagu an manu bo nan layah te igongahana.

⁵Nan tagun pihilona nadan nawotwot ya hi Apu Dios an nunlumu i diday pinihulna. Ya nan tagun mun'am'amlong hinan adi maphod an ma'at hi udum an tatagu ya dusaon Apu Dios.

⁶Nadan a'amamma ya pun'amlonganda nadan a'apapuda ya nadan u'unga ya pun'amlonganda nadan a'ammmodda.

⁷Nan paddungnay ma"id ha nomnomnan tagu ya bokon nan maphod an panapit di ibagana. Mu nan ap'apu ya ma"id ha layah ibagana.

⁸Nan tagun bayadanay udum an tagu ta ma'at nan nibahhon pohdonan ma'at ya hay punnomnomna ya ay gayumah diyen hiya te ma'at nan pohdona.

⁹Nan tagun pohdonan minaynayun an maphod di pi'hayyupanah tatagu ya mahapul an linglingona nan kumpulnan adi maphod an inatdan hiya. Mu nan tagun adina linglingon di numbahulan di ibbana ta hidiyey ena hapihapiton ya hidiyey mamahbah hinan maphod an pi'hayyupanah ibbanan tagu.

¹⁰Nan nanomnoman an tagu ya ta'on on maminghan ha pangihingalandan hiya ya dakol di ma'adalna an adi umat hinan paddungnay ma"id ha nomnomna an ta'on on mumpihinggahut (100) hi panoplatandan hiya ya ma"id damdama ha hilbina.

¹¹Nan mangohen tagu ya amod on nan adi maphod di at'attona ta palpaliwana ya dimmatong ha nunhiglay pundusana i hiya.

¹²Udu'dulna boh on ha bear an inibtikday imbabalenay damuwon mu ta bokon ha paddungnay ma"id ha nomnomnan tagu an nalgom di atona.

¹³Nan tagun maphod di ipatigodan hiya mu on damdama pibo adi maphod di ipatigona ya adi umaan di adi maphod an ma'ma'at hinan nunhituwana.

¹⁴Nan adi pun'i'innawatan ya ay niguwang ha naptut an liting ta gahin di pa'ibagon an ipanuh ta ay mabongbong ta adi madoldol.

¹⁵Nan munhumalya an adina moltaon nan numbahul mu moltaona nan ma"id ha bahulnan tagu ya umipabungot i Apu Dios.

¹⁶ Nan paddungnay ma"id ha nomnomnan tagu ya ma"id ha hilbinah e pun'ihkulon te ayyuy pihhu ya ma"id damdama ha naminhodnan matudduwan.

¹⁷ Nan nahamad an gayyum ya minaynayun di pamhodna an umat hinan hi ibba an wada'ey punligatan ya bumoddang.

¹⁸ Nan tagun ma"id ha nomnomna ya mabalin an mihapitan ta hiyay mumbayad hinan utang nanohan tagu.

¹⁹ Nan tagun nan pumbahulan di pohpohdonan aton ya amod on mi'hannu. Ya nan tagun munlattuwag ya hay abahbahanay ayna hamhamma"on. ²⁰ Ya atbohdih nan tagun nan adi maphod di nonnomnomona ya haphapitona an ma"id mo bo ha odamonah maphod an ammuna nan ena abahbahan.

²¹ Nadan nangimbabale hinan muntalungango ya ongal di inomnomanda ta ma"id ha amlongda.

²² Nan pun'am'amlongan di nomnom ya ay agah an ipaphodnayadol. Mu nan inomnomana ya lo'tat ya hidiyey lummuuh pundogohan.

²³ Nan adi maphod di pangatnan tagu ya mabalin an mabayadan ta adi ma'at nan nipto' an ma'at'ot hinan punhahapitan.

²⁴ Nan nala'ing an tagu ya nomnomnomonay niyatana nadan atona. Mu nan paddungnay ma"id ha nomnomna ya ma"id ha poto' di nomnomonah atona.

²⁵ Nan muntalungangon imbabale ya hiyay lummuuh umukayungan nan hi amana ya hay inomnomana nan hi inana.

²⁶ Adi ahan maphod on nan ma"id ha bahulnan tagu di madusa. Te nibahho hi'on namaag nan nipto' di pangatnan tagu ya hiyay paligatonda.

²⁷ Nan tagun madinol an waday innilana ya adina pamaag hi hapihapit ya atbohdin adi hi kittang on bimmungot. ²⁸ Te ta'on on nan paddungnay ma"id ha nomnomnan tagu ya onha dindinnongan ot mabalin an alyonday nanomnomana.

18 ¹ Nan tagun ma"id ha maphod hi pi'hayyupanah tatagu ya hidiyey panginnilaan an hay adolna ya ammunay nomnomnomona te ngohayonan namin nan madadawoh an ibagan nadan udum i hiya.

² Nan tagun paddungnay ma"id ha nomnomna ya adina igongahan di ibagan nadan ibbana te gahin on hiya ahan di humapit.

³ Nan adi maphod an pangat ya hidiyey lummuuh ibabainan. Te niluh'e mon na'aan nan maphod an punnomnom di ibban dita ya hay pihulday mipallog.

⁴ Nan hapiton nan nanomnomana tagu ya umat hinan liting an adallom di alpuwana onu nan maphod hi inumon an liting hinan obob.

⁵ Adi ahan maphod on handiyan nan bimmahul ta nan ma"id ha bahulnay madusa.

⁶ Nan paddungnay ma"id ha nomnomnan tagu ya hay lummuuh panuntukandan hiya ya gapuh nan umipabohol an hapitona. ⁷ Ya athidih

nan agge na'ono'nong an hapitona an hidiyey lummu abahahaha te paddungnay hay to'onay mamitun hiya.

⁸ Nan e panumtumbu'an hi ibba ya hidiyey pohpohdon di tatagun donglon an ay hanan makan an maphod hi pangukmunan.

⁹ Nan humigan muntamu ya numpaddungdah nan tagun hay ena pamahbahan hi ibbanan taguy at'attona.

¹⁰ Hi Apu Dios ya ni'alig hi ihi"ugan nan tagun nipto' di pangatna ta wan mipapto'. ¹¹ Mu hay punnomnom nan kadangyan an tagu ya mabalin an pumbaliwna nan kinadangyana an ay hanan atagen binattun alad.

¹² Nan munlattuwag di ataguna ya hidiyey lummu abahahaha. Mu nan innilanan mumpada"ul ya mabalin an mipabaktu.

¹³ Nan tagun adina igongahan di ibagada on timbalna ya umipabain an ay nawe'we'!

¹⁴ Nan tagun ongal di naminhodnan tumagu ya ongal di iboddangnah nan ena pumphodan hinan dogohna mu nan ma"id ha namnamaonah pumphodana ya mamaman adi pumphod.

¹⁵ Nan nala'ing an tagu ya pinhodnan ma'ud'udman di innilana ta hiya nan donglonay tugun nadan nun'onomnoman.

¹⁶ Nan tagun pinhodnan e mi'hapit i ha nabaktuy sa'adnan tagu ya maphod di idadaana ha idatnan diyen tagu ta pangigadulanan e mi'hapit. ¹⁷ Hinan punhumalyaan ya nan mamangulun mahumalya ya ay nipto' nan hinapitna mu indani ta humapit nan nundalom ya athidi bon ay nipto' nan hinapitna.

¹⁸ Ot hay mabalin an ma'at ta wan malpah hidiyen miyahapit an dalloman di duwan tagun numpaddung an ongal di abalinanda ya ibunutda.

¹⁹ Nan nahakitan an hi ibba ya naligat an ibangngad nan maphod an pi'hayyupan i hiya mu nan e pangabakan hinan ongal di abalinanan boble. Te wada'ey nunhahannuwan ya umat hinan na'aladdun geyt an an naligat hi hogpon.

²⁰ Nan ibungan nan hapiton an maphod onu adi maphod ya hiyay apiton. ²¹ Te nan hapiton ya mabalin an hiyay lummu tumaguwan onu atayan. Ot mahapul an way ohaon abulutona nan pumbalinan nan hapitonan.

²² Nan lala'in inakhupana nan babain ahawaona ya ayna inakhupan ha nabalol hi odona ta hidiyey mangipatigoh amaphod Apu Dios i hiya.

²³ Hi'on nan nawotwot di humapit ya mumpahpahmo' mu hana'en kadangyan di humapit ya umipadngol.

²⁴ Wadaday munggagayyum an dida on nunhimpapa"ihda mu wadada boy munggayyum an himmalladah hinagi.

19 ¹ Udu'dulnay ta'on onta nawotwot mu ta ma"id ha kuluk hi at'aton mu hanan paddungnay ma"id ha nomnomna an hapitonay layah.

² Ya adi bo maphod on namanamaag an gapuh agge nanginnilaan te onha kumpulnan nipanomnom on na'ibagon an inat ot adi maphod di pumbalinana.

³ Nan nalgom di pangatnan tagu ya hiya on binahbahnay nitaguwana. Mu indani damdama ya hi Apu Dios di pabahulona.

⁴ Nan kadangyan an tagu ya dakol di gagayyumna. Mu nan nawotwot an tagu ya ma"id ha naminhod i hiya.

⁵ Nan nibahhoy puntistiguna an layah di ibagana ya madusa.

⁶ Nan tagun ma'abboddang ya dakol di munhapul i hiya ya atbohdih nan nalakan hummo' an dakol di gagayyumna. ⁷Mu nan tagun mi'anuh nan nunhituwana ya adi ibilang nadan i'ibana an hiya ya hi ibbada ot namama mo boy adi pangibilang nadan udum an tatagu i hiya. Ta ta'on on nganney atonan mumpahpahmo' i dida ya adida hom'on.

⁸ Hanan tagun pohpohdonayadolna ya pohdonan ma'udman di la'ingna. Nan waday namhodnan mun'adal ya pumhod di nitaguwana.

⁹ Nan munlayah an tistigu ya adi mibahhoy adusaana.

¹⁰ Nan paddungnay ma"id ha nomnomnan tagu ya adina lebbeng an kumadangyan. Ya namamama mon adina lebbeng an nan himbut di mun'ap'apuh nadan ap'apu.

¹¹ Nan nanomnoman an tagu ya adi hi kittang on bimmungot. Ya wada'ey adi maphod hi inatdan hiya ya linglingona. Ta hidiyey atigan di amaphodna.

¹² Nan bumungot an patul ya atatakut an umat hinan mun'olmom an layon. Mu hummo'e bo ya maphod te umat hinan udan an sibugana nan nitanom.

¹³ Nan imbabalen paddungnay ma"id ha nomnomna ya bumahbah hinan a'ammodna. Ya nan ahawan babain nangodowan ya umipahigan ay lomlom.

¹⁴ Hay mabalin hi boltanon hinadan a'ammod ya bale ya kinadangyan. Mu hi Apu Dios ya abuh di mabalin an mangidat i ha nanomnoman hi babai hi iyahaha.

¹⁵ Nan ma'ahiggan tagu ya malmallo' ya abuh di pohpohdonan aton mu nan athidin tagu ya ma'agangan.

¹⁶ Nan tagun mangun'unud hinan tugun Apu Dios ya hiyay mi'tagu. Mu nan adi mangun'unud ya hidiyey lummuhihiwayana i Apu Dios.

¹⁷ Hanan bumoddang hinadan nawotwot ya ay hi Apu Dios di impa'utangana ot hiyay ukod an mamallog.

¹⁸ Ihipunyun tugunon nadan imbabaleyu hinan amammanogda ta mabalin ni' an matudduwanda. Te adiyu'e aton hidi ya ayyu boddangan didan mamahbah nitaguwanda.

¹⁹ Nan tagun nunhiglay bungotna ya holtaponay adi maphod an pumbalinan nan bungotna. Ya ta'on hi boddangam ta mihwang hi adusaana ya ipidwana damdama.

²⁰ Nan tagun donglonay tugun ya pohdonan matudduwan ta lo'tat ya manomnoman.

²¹ Hay tagu ya dakol di nomnomnomonah atona mu hay mipa'annung ya nan ninomnom tuwalin Apu Dios hi ma'at.

²² Hay pohdon di tagu ya nan minaynayun an pamhod. Udu'dulna bo nan nawotwotta mu hanan eta munlayah.

²³ Nan tagun hi Apu Dios di taktahan un'unudona ya maphod di pi'taguwana. Ya atbohdin malinggop ya ma"id ha holtapona hi adi maphod an ma'at.

²⁴ Nan tagun nunhiglay higana ya ta'on on ha umiduhana on higanana.

²⁵ Nan pumihupihul an tagu ya mahapul an titilgon ta wan pun'adalanan nadan udum an paddungnay agge nanomnoman. Mu nan nanomnoman an tagu ya waday ma'adalnah nan pangihingalandan hiya.

²⁶ Nan imbabalen pulhonay gina'un di hi amana ya dinolahnay hi inana ya umipabain an tagu. ²⁷ Ot hiya nan he'an imbabale' ya inaynayunmun mun'adal hinadan nipto' an tudtudu. Te onha idinongmu ot lo'tat ya ta'on on nan innilam tuwali ya malingling.

²⁸ Hi'on ningamut hinan tistiguy adi maphod di nomnomna an gahin ahan on waday ilumlumna ya adi ma'innila nan immannung an numbahul. Te nan athinan adi maphod di pangatnan tagu ya amod on nan nibahhoy atona.

²⁹ Nadan pumihupihul an tatagun nipaddung hinan ma"id ha nomnomna ya adi mibahhoy adusaanda.

20 ¹Nan ma'inum an bumutong ya lummuh punlayahan ya pi'yawwitan nan nanginum. Ot nan tagun mumbutong ya agge nanomnoman.

² Nan bimmungot an patul ya umat hinan layon an mun'alumiyom. Ot nan tagun mangipabungot i hiya ya ay ma"id ha itaguwana.

³ Nan tagun adina pohdon an mi'yawwit ya mapemanan. Mu nan paddungnay ma"id ha nomnomna ya amod on mi'yawwit.

⁴ Nan ma'higgan e mun'aladu ya ma"id ha gapasonah nan ahigapas.

⁵ Nan nomnomnomon diohan tagu ya ay liting an nidallom ta naligat an mapau'. Mu nan nala'ing an tagu ya mabalin an pahapiton ta iba"agna.

⁶ Dakolday mangalih pohpohdonday ibbadan tagu mu naligat an akhupan ha taguh immannung an athidiy pangatna.

⁷Mipa'amlongda nan imbabalen nan tagu an nan miyunnudan hinan pohdon Apu Dios di atona.

⁸ Wa'et nan patul di mangipanuh hinadan tatagu ya innilana nan maphod di at'atona ya nan adi.

⁹ Ma"id i dita'un tatagu ha mabalin hi alyonay nipto' di pangatna onu ha ma"id ha bahulna.

¹⁰ Hi Apu Dios ya nunhiglay aggena naminhod hinan kuluk an aton di tatagun mangikilu ya munlukud hinan inginada.

¹¹ Ta'on on nan unga ya ma'innilah nan pangatna hi'on maphod di a'atna.

¹² Hi Apu Dios ya indattan dita'uh mata ta panigo ya inga ta pangngol ta'u.

¹³ Nan attaanon malomalo' ya mamaman mawotwot. Mu nan mahlun e muntamu ya mabalin an mahawwalan di itanudna.

¹⁴ Nan ma'ahhangah nan nguminaana ya alyonay, Na'angngina nayyay panginginam. Mu indani ta tinawalana ya ahina e imbagabaga an nalakay nangattangna.

¹⁵ Na'ballol nan balitu' ya nadan udum an nabalol an batu mu nabalballol nan tugun di nanomnoman an tagu mu naligat hi akhupan di athidi.

¹⁶ Nan tagun mangihapit hi umutang an mangili ya mahapul an waday alahan lubung diyen mangili ta waday pangidonana hi utang diyen tagun aggena in'innila.

¹⁷ An namin nan kuluk di na'alaana an umat hi makan ya mabalin an mun'am'amlong nan nangalan mangan. Mu indanit hay umudi ya ayna inhubu ha gahal.

¹⁸ Wada'ey nomnomnom an aton ya mumpaboddang'ah nan nun'anomnoman. Ta umat boh nan e mi'gubat an donglona ni' di tugun di udum an tatagu ya ahi makak an e mi'gubat.

¹⁹ Nan tagun amod on hay ibbanay ena tumtumbu'on ya ma"id ha mipa'en hiya. Ot hanat bokon nan mahapit di em pi'tumtumbu'an.

²⁰ Nan tagun idutanay ammodna ya adi madney pi'taguwana. Te lo'tat ya ay dilag an ma'ibagan madop.

²¹ Nan nipabolan an agge nipto' di na'alaana ya adi maphod di pumbalinanah umudi.

²² Wada'ey inatdan he'a hi adi maphod ya adim nomnomnom an iballoh. Mu idinolmu i Apu Dios ot boddangan da'a.

²³ Nan kuluk an pungkilu ya nan nibahhon punlukud hinan ingina ya umipabungot i Apu Dios.

²⁴ Hi Apu Dios ya hiyay ukod hinan nitaguwan diohan tagu. Ot adi gahin on ta'u ma'awatan an namin nadan ma'ma'at.

²⁵ Nan tagun adi munnomnomnom ya waday imbagana i Apu Dios hi atona ya indani ya imbahhona ya hiyay maligatan.

²⁶ Nan nanomnoman an patul ya innilanah on nganne nadan adi maphod di pangatda ya dusona dida an ma"id ha homo'na.

²⁷ Hi Apu Dios ya indatnay nomnom ta'u ya hay abalinan ta'un mangimatun hinan nipto' ya nan nibahho.

²⁸ Nan pun'ap'apuwan diohan patul ya malinggop hi'on minaynayun di pamphodnan mumpapto' ya nipto' di atanan mangipanuh hinadan tataguna an ma"id ha pangipangngelana.

²⁹Nadan mumpangilog an linala'i ya mapemananda te nan bikahda. Mu nadan a'amamma ya malispituda an gapuh nan tawonda.

³⁰Hinuddum ya gahin on waha ma'at i dita'uh nunhiglan punligatan ya ahi ta'u manomnoman ta idinong ta'u mohpe nadan adi maphod an pangiy'e ta'u.

21 ¹Hi Apu Dios ya hiyay ukod hi an namin an nitaguwan nan patul ta mabalin an nan pinhod Apu Dios di ma'at an umat hinan ninomnoman pangipluyan nan liting hinan wangwang.

²Hay punnomnom diohan tagu ya nipto' an namin nan at'atona. Mu hi Apu Dios ya innilana hi'on immannung an nipto' nan wah nomnomna.

³Nan e pangatan hi nipto' ya nan maphod an bokon kuluk ya hidiyey umipa'amlong i Apu Dios an bokon nan i'nong i hiya.

⁴Nan itangtangngadnay panigona ya nan mumbaktuy nomnomnan tagu ya hidiyey pangimatunan hinan pumbahulan an at'atton nadan adi maphod di pangatnan tatagu.

⁵Nan tagun pa'anomnomonay atonan e bumola ya hiyay waday bo'laona. Mu nan adina pa'annomnomon on inatnay atona an gapuh aptuna ya lo'tat ya makulangan hinan mahapulna.

⁶Nan kinadangyan an kuluk di na'alaana ya nalakan ma'umah ya hiya boy lummuhi atayan.

⁷Nan adi maphod di pangatnan tagun amod on e mi'yawwit ya lo'tat ya hidiyey lummuhi adadagana te aggena ahan pinhod an aton nan nipto'.

⁸Nan pangiy'en nan nabahulan an tagu ya nakillu. Mu nan ma'id ha bahulnan tagu ya maphod di pangiy'ena.

⁹Udu'dulna boy eta umiwe i ha allung mu hanan eta miha"ad i ha bale hi wahdi ha babaih ahawa hi ma'ngoddo.

¹⁰Nan adi maphod di pangatnan tagu ya amod ahan on nan adi maphod di nomnomonah aton ya ma'id ha homo'nah ibbanan tagu. ¹¹Nan nanomnoman an tagu ya waday adalonah nan mitugun i hiya. Ya ta'on on nan agge nanomnoman ya mabalin an manomnoman hi paniganah adusaan nan pumihupihul an tagu.

¹²Hi Apu Dios an nipto' di pangatna ya tigtiggona nan ma'ma'at hi nunhituan nan adi maphod di pangatnan tagu ta hiyay ukod an manadag i hiya.

¹³Nan tagun ma'id ha homo'nah nan nawotwot an e mumpaboddang i hiya ya indanit hiyay munhapul hi boddang ya ma'id ha mammo' i hiya.

¹⁴Nan ligalu an adi ipatpatigo ya inye hinan waday bimmungotana ya ma'aan di bungotna an ta'on on nangimbubbungot.

¹⁵Wa'et nipto' di pangipanuh hi tatagu ya mipa'amlong nadan mangat hinan niyunnudan hinan pohdon Apu Dio mu nada'en adi maphod di pangatda ya nunhiglay takutda. ¹⁶Nan tagun mangiwalong hinan maphod an tugun ya hama'onay atayana.

¹⁷Nan tagun hay pohpohdona ya nan pun'amlongan diadolna ya mumbalin hi nawotwot ya atbohdih nan pinpinhodnan e mangmanginnum ya nan e mangmangngan hi nun'anganan makan an adi kumadangyan.

¹⁸Nan adi maphod di pangatnan tagu an amod on hay ena pamalpaligatan hinadan maphod di pangatda ya lo'tat ya hidiyen adi maphod an pangatna ya hiyay a'atana.

¹⁹Udu'dulna boy eta umiweh nan agge naboblayan mu hanan mi'hituta i ha babaih ahawa hi nangodowan ya ma'abbungot.

²⁰Nan nanomnoman an tagu ya minaynayun an wadan namin di mahapulnah nan nunhituwana. Mu nan paddungnay ma"id ha nomnomna ya umahonan namin di bino'lana.

²¹Nan tagun nan miyunudan hinan pohdon Apu Dios di atona ya maphod di pi'taguwanah tun luta ya atbohdin waday pamiyal di tatagun hiya.

²²Nan nanomnoman an opisyal di tindalun e mi'gubat ya adalona ni' di a'at nan matakutan an boble ta innilaonah on nganney pundinolanda ya hidiyey dinadaga.

²³Nan tagun ono'nonganay hapitona ya mihwang hi punligatan.

²⁴Nan munlattuwag an tagu ya mangadanan hi Ma'apihhul ya hi Munlattuwag te ma"id ha bilang di udum an tatagu i hiya.

²⁵Nan tagun humigan muntamu ya hay adolnay akihana te lo'tat ya ma'ulat ²⁶an ta'on on manmanuy nomnomna te dakol di pohdonan mawadan hiya. Mu adi athidih nan nipto' di pangatnan tagu te nanongnay bumoddangana an ma"id ha ukuhna.

²⁷Nan i'nong nan adi maphod di pangatnan tagu ya nunhiglan umipabungot i Apu Dios ot namama moh on adi maphod di gapunah ena pang'iongan.

²⁸Nan munlayah an tistigu ya ma"id ya mundongol i hiya mu nan immannung di ibagana ya donglon di tataguy ibagana.

²⁹Nan adi maphod di pangatnan tagu ya natulid an ma"id ha baina mu nan maphod di pangatna ya pa'anomnomona on ahina aton.

³⁰Nan la'ing di tagu ya nan abalinanan muntugun ya manghan di iboddangnan hiya hi'on ningamut an inwalong Apu Dios. ³¹Ya atbohdin ta'on on idadaan di tataguy kabayu hinan eda pi'gubatan mu gahin di hi Apu Dios di mangiyabulut hi pangabakanda.

22 ¹Hay udu'dul hi piliyon ya nan maphod an pangat te malispituta mu nan kinadangyan an umat hi pillu ya balitu'.

²Hay numpaddungan nadan kadangyan ya nadan nawotwot ya hi Apu Dios di nunlumu i didan namin.

³Nan nala'ing an tagu ya ilmunae'n waday adi maphod an ma'at ya umaan hidi. Mu nan agge nanomnoman ya onao ay e pundamu ta ingganah on wada ha ma'at i hiyah adi maphod.

⁴Nan tagun mumpada"ul ta hi Apu Dios di takutana ya waday gunggunanan umat hi kinadangyan ya pamiyal di tatagun hiya ya maphod an pi'taguan hitun luta.

⁵Nan balolonay nitaguwana ya adawwiyanay adi maphod an paddungnay bitun agahan di adi maphod di pangatnan tagu.

⁶Itudduwam nan ungah nan maphod an pangat ta hiyay atona ta wa'e ta kimmilog ya adina linglingon.

⁷Nan nawotwot ya ammunah ba'baalon nan kadangyan. Ya atbohdih nan nagawatan an mabalin an baalon nan nunggawatana.

⁸Nan tagun nan adi maphod di atona ya lo'tat ya nunhiglan adi maphod di ma'at i hiya. Ta adina mo abalinan an manattatakut hi ibbanan tagu.

⁹Nan tagun innilanan hummo' hinadan nawotwot ya mawagahan.

¹⁰Onha pakakon ta'u nadan nala'ing an pumihul an tatagu ya mama'id di munhahannu ya munhimpapadngol.

¹¹Nan tagun hay pohdona ya nan maphod an nomnom ya nan ma'ulen panapit ya ibilang nan patul hi gayyuma.

¹²Ipapo' Apu Dios nan maphod an tudtudu ta minaynayun an mabalin an mitudtudu mu adina unnudan nan layah di itudtuduna.

¹³Nan ma'ahiggan tagu ya dakol di pambalnah nan adina e puntamuwan te alyonay alina ya wahdi ha layon hi dola hi mangan i hiya onu hay mamaten hiyah nan awon.

¹⁴Nan panapit nan babain ilanuktapnay ahawana ya ay bitu an agahan nadan linala'in aboholan Apu Dios.

¹⁵Nadan u"unga ya apyanadin nalgom di at'atonda. Mu titilgon'e dida ya lo'tat ya matugunda ta mipaphod di pangatda.

¹⁶Nadan mamalpaligat hinadan nun'awotwot ta wan hiya ni' ahan di kumadangyan ya nan mangmangdat hi ligaluh nadan kakadangyan ya numpaddungdan mumbalindah nawotwot.

Nan Tulumpulun Tugun

¹⁷Hay maphod ya igongahanyu nadan tugun nadan nun'anomnoman ta hiyay adalonyu ¹⁸te mipa'amlong i da'yu hi'on adiyu linglingon ta mabalin an ipa'innilayu boh nadan udum. ¹⁹Ibaga' datuwe i da'yuh ad uwani ta wan hi Apu Dios di pundinolanyu. ²⁰Ya hay indat'u i da'yu ya datuwen ma"aphod mahan an tugun ya tudtudu ²¹an nitudo' ta innilayu nan nipto' an pambalyuh nadan mahmahanda i da'yu.

Nan Namangulun Tugun

²²Ot hay oha ya adiyu mamaon di punligatan nadan nawotwot an umat hinan punhumalyaan onu nan pamlohangyuh nan gina'uda an gapu ta ma"id ha abalinanda. ²³Te hi Apu Dios e di mabaal ya dusonah ate nadan mamloh nadan nabalol an wadah nadan nun'awotwot.

Nan Mi'adwan Tugun

²⁴ Ya adi ayu bo midmendum hinadan hi kittang on bimmungot ²⁵ te alina ya inyunnudu i diyen impa'inghada ya niluh'e mon immingha ya naligat hi eyu pangidinongan.

Nan Mi'atulun Tugun

²⁶ Ya adiyu bo iyabulut an da'yuy mangita'dog hi utang di udum ²⁷ te ma"id'e ha pumbayadda ya nan gina'uyuy alandah mibayad.

Nan Mi'apat An Tugun

²⁸ Ya adiyu bo ipatnan idlig nan pogpog an iniphod di a'ammod hidin nadne.

Nan Mi'aliman Tugun

²⁹ Ya nan tagun nala'ing an mangat hinan niyukod i hiyan tamuna ya mabalin an hiyay mapilin e muntamuh balen di ap'apu an bokon hi balen nadan nun'ada"ul an tatagu.

Nan Mi'anom An Tugun

23 ¹Alina'e hi ayagan da'an e mi"an i ha nabaktuy sa'adnah tagu ya maphod di nomnomnomom hidiyen sa'adna ²ta ta'on on alina hi nahupu'a ya ono'nongom bahan ³ta adim ilaput di a'an hinan mun'aphod an makan an indadaana te ma"id ha mapto' ya hidiyey patmatnanan he'a.

Nan Mi'apitu An Tugun

⁴ Ya immannung'e an nanomnoman'a ya adim punhiglaon di pangigalidmuhadolmu an gapuh naminhodmun kumadangyan. ⁵Te hay piihu ya ay napaya'an an hingkitangan on ma"id an ay timmayap.

Nan Mi'awalun Tugun

⁶ Ya adi'a e mi'mi'an hinan tagun ma"ukuh ya adim omnawan nan mun'aphod an makan hi balena. ⁷Te ta'on on alyonan he"ay agam ta uminum'a ya nangan'a mu i diyen imbagana ya agge nalpuh nomnomna te nonomnomanay nginan di makan. ⁸Ya onha mangan'a ot ay damdama tumulu nan inanmu ta ma"id ha hilbin nan nunhanaam i hiya hinan inanmu.

Nan Mi'ahiyam An Tugun

⁹ Ya adim ipatnan muntugun hinan tagun paddungnay agge nanomnoman te pihilona damdama.

Nan Mi'ahimpulun Tugun

¹⁰ Ya adiyu ipatnan idlig nan pogpog an iniphod di a'ammod hidin nadne ya adiyu pulhon nan lutan di napuhig. ¹¹ Te hay nahamad hi mangihakit i dida ya hi Apu Dios ot hiyay mangiballohi da'yu.

Nan Mi'ahimpulut Ohan Tugun

¹² Ya ihamadyun igongahanan mituddun da'yu ta inhamadyun adalon nadan mabalin an adalonyun diye.

Nan Mi'ahimpulut Duwan Tugun

¹³ Ya adi ayu mun'og'ongan manitilog hinan unga te nan panuplitanyun hiya ya atugunana ya adi umi'ateh diye ¹⁴ te onnot on miyadawwih nan pumbahulan lummuhi atayan.

Nan Mi'ahimpulut Tulun Tugun

¹⁵ He'an imbabale' ya onha manomnoman'a ot nunhiglay amlong'u.
¹⁶ Ya namamay amlong'u hi'on donglo' an nipto' di panapitmu.

Nan Mi'ahimpulut Opat An Tugun

¹⁷ Adi'a umamoh nadan tatagun nadan pumbahahulan di at'atonda ta onnot hay em pangipabaktawan i Apu Dios hinan nitaguwam di gamgamam. ¹⁸ Ot atom'ehdi ya mipa'annung nan namnamaom an em pumhodan hi udum an algo.

Nan Mi'ahimpulut Liman Tugun

¹⁹ Igongaham an imbabale' ta wan hay em anomnoman di mun'onan hi nomnommu ta inaynayunmun mangat hi maphod. ²⁰ Ta adi'a e mi'mi"uyug hinadan tatagun ma'nginnum onu nadan nunhiglay hupudah makan ta ilaputanday a'an. ²¹ Te nan nahupu ya mabutobutong ya lo'tat ya mumpalpaligat hi a"idna. Ya atbohdii pumbalinan nan tagun nangan'e on in'ilognan nalo' te lo'tat ya ammunha lameh inhakbatna.

Nan Mi'ahimpulut Onom An Tugun

²² Donglom di tugun nan hi amam te ma"id'e ya undan namaag ya wada'a. Ya adim pahiwon hi inam hinan a'in'innana. ²³ Ta ipatnam di abalinam an manginnilah nan nipto' ya nan tudtudun mangdat hi anomnoman ya abalinam an mangimatum hinan nipto' ya nan nibahho te danaey nun'abalol hi magamgaman. Ot adim iyabulut an mama"iddan he'a. ²⁴ Nan imbabalen nanomnoman ya nipto' nimpey pangatna ya ongal di pun'amlongan nan hi amana. ²⁵ Ot maphod di ipa'amlongyu nadan a'ammodyu an namamah nan hi inayun nangiyayyam i da'yu.

Nan Mi'ahimpulut Pitu An Tugun

²⁶Igongaham an imbabale' an lala'i ta nan pangkiye'e di un'unudom.
²⁷Ta adi'a umeh awadan nan mumpabpbabayad hiadolnan babai ya nan mi'ilala'in waday ahawana te hay nipaddunganda ya nan atatakul an bitu an lummuuh atayan. ²⁸Ya hay oha bon nipaddunganda ya nan e mumbota'ta hiya nan dakolday linala'in ma'a"ulan.

Nan Mi'ahimpulut Walun Tugun

²⁹Wadaday tatagun ma'nginnum ta hiya nan bumabbatag di matada. Ya nanongnan magugundilan di adolda ta ahohomo'da te ma"id ha amlongda ta hiya nan amod onda gumulu ya dakol di lilida. ³⁰Dida nadan gahin ahan on umedah nan awadan di dakol an ma'inum ta agandah inum. ³¹Ot hiya nan ta'on hi tigom an maphod di tigon nan ma'inum an aho hongoh panginuman ya adi'a ma'agagan an uminum. ³²Te manuh nan panginumam mu indanit umudi ya ay da'a kinalat i ha ulog hi waday gitana. ³³Ya atbohdin dakol di tigom hi atatakul di a'atna. Ya ta'on on nan punnomnommu ya hapitom ya ma"id ha poto'na. ³⁴Ya hay punli'nam hiadolmu ya ay'a humanewwegan. ³⁵Ya indanit inggibomu ya ahim alyon di, Tangantu anu ona' ay hinanuntuk mu agge' inilmu? Uddinno' nin anu ta wan bumangona' ta eya' bo uminum?

Nan Mi'apulut Hiyam An Tugun

24 ¹Adi ayu umamoh nadan adi maphod di pangatdan tatagu ta bokon diday eyu id'idduman. ²Te dida ya amod on han eda pi'yawwitan di nomnomnomonda ya haphapitonda.

Nan Mi'abaintin Tugun

³Nan nanomnoman an tagu ya nahamad di iyammanah punhituwana te maphod di pun'u'unnu danandan hina'amma. ⁴Ya gapu ta innilanay nipto' an atona ya punuwonay balenah mun'aphod ya nun'anginan gina'u.

Nan Mi'abaintit Ohan Tugun

⁵Nan nanomnoman an tagu ya ongal di abalinana te gapuh la'ingna ya innilanay atona ta ma'udman di abalinana^e ⁶an umat hinadan e mi'gubat an mahapul an ihamaddan nomnomnomon di atonda ya mahapul bon donglonday tugun di dakol an nun'anomnoman ta wan mangabakda.

^e 24:5 Hay alyon di udum an Biblia hinan ma'udan di abalinana ya ong'ongngal di abalinan nan nanomnoman mu nan mabikah an tagu.

Nan Mi'abaintit Duwan Tugun

⁷Nan punhahapitan nadan nun'anomnoman an tatagu ya adi ma'awatan nan paddungnay ma'id ha nomnomna. Ta hiya nan namaag ya dindinnongan hi'on waday mahahhahapit.

Nan Mi'abaintit Tulun Tugun

⁸Nan tagun hay nonomnomonah atona ya nan adi maphod ya lo'tat ya mangadanan ta hi Mangulgulu. ⁹Nan adi maphod an punnomnom ya bahul. Ya nan tagun pumihupihul ya ahiawan di tatagu.

Nan Mi'abaintit Opat An Tugun

¹⁰Nan tagun adi pa"itpol hi ligat ya hidiyey itigana an na'akkapuy.

Nan Mi'abaintit Liman Tugun

¹¹Wa'e ta waha ipapateda an ta'on on ma'id ha bahulna ya tigonyu ta boddanganyu ta adi mipapate. ¹²Ma"id ha mapto' ya alyonyuy, Tanganu on attaon an e mi'bi'biyang? Mu hi Apu Dios ya nan punnomnommuy tigona te innilanay a'at di hinohha. Ya atbohdin hay idatnan gunggunam ya nan iyunnudan hinan at'atom.

Nan Mi'abaintit Onom An Tugun

¹³Imbabale', uminum'ah danum di iyukan ot maphod te malumiih. ¹⁴Ya hay nipaddungan nae ya nan nahamad an tugun. Te nan nahamad an tugun ya ipaphodnay pangkiye'em ta wan waday dinolmuh nan em pumhodan hi udum hi algo.

Nan Mi'abaintit Pitu An Tugun

¹⁵Adim iyunnudan hinadan adi maphod di pangatdan tatagu an eda mangmangngako hi balen nadan maphod di pangatnan tatagu ya pina"ihday nunhituwanda. ¹⁶Te nan tagun maphod di pangatna ya ta'on on atnay dumatong hi patnah nan nitaguwana ya adi damdama ma'abak. Mu adi athidih nan tagun adi maphod di pangatna te onha hiyay a'atan ha athidih ligat ot minayun di adadagana.

Nan Mi'abaintit Walun Tugun

¹⁷Ta'on hi waday adi maphod hi ma'at hinan ma'ahihhiwon he"a ya adim dildilaon hi nomnommu ¹⁸te innilan Apu Dios di wah nomnommu ya adina mo dusaoon hidiyen ma'hiihiwon he"a.

Nan Mi'abaintit Hiyam An Tugun

¹⁹ Adi'a bumungot an gapuh nadan adi maphod di pangatdan tatagu onu e'a umamoh i dida ²⁰ te nan adi maphod di pangatnan tagu ya ma'id ha namnamaonah maphod hi ma'at i hiyah udum hi algo ya mi'alig di nitaguwanah nan dilag an madop.

Nan Mi'atulumpulun Tugun

²¹ Imbabale', hanat hi Apu Dios di taktam ta hiyay un'unudom ya atbohdin piyalom nan patul ta adi'a midmiddum hinadan mungnohe i hiya. ²² Te hi Apu Dios ya ta'on on nan patul ya abalinandan ipa'aliy ligat.

²³ Ya datuwe boy udum an tugun di nun'anomnoman.

Nan mangipanuh hi dadalloman ya adi maphod on waday pangipangngelanah nan humalyaona. ²⁴ Te onha namaag ya alyonay ma'id ha bahul nan bimmahul ot hiyay ahiawan nadan tatagu ya inidutanda.

²⁵ Mu nan nipto' di punhumalyana an alyonay numbahul nan nangat hi bahul ya hiyay mawagahan ya ta'on on nadan tatagu ya hiyay piyalonda.

²⁶ Nan tagun immannung di pambalnah nan waday mibaga i hiya ya hidiyey panginnilaan an nahamat hi gayyum.

²⁷ Hay mamanguluh atom ya tigom ta waday bum'o'laam ya indadaanmu nan puntanoman ta waday itanudmu ya ahim mohpe iyamma ha punhituwam.

²⁸ Adim tistiguwan nan agge immannung an lummuuh abahbahan di hinaggonmu. ²⁹ Ya atbohdin adim alyon hi ato' hituwen adi maphod ta iballoh'u nan inatnan ha'on.

³⁰ Wada han nangi'wa' hinan puntanoman han ma'higgan tagu an agge nanomnoman ³¹ ya inoy an bimmikah di holo' ya pagat ya nun'apapa'ih bo udot nadan binattun alad nan puntanomana. ³² Ta hay na'adal'uh naniga' i dadiye ³³ ya nan tagun alyona eh'ay malo' ni' i ha na'omtang onu op'opona ni' di ta'lena ta mun'ible ³⁴ ya pinpalpaliwana ya ma'id ha mahapulnah nan nunhituwana ta ay nahod'aip.

25 ¹Datuwe boy udum hi imbagabagan Solomon an impitudo' din patul an hi Hesekiah hinan bobleh ad Judah.

² Dayawon ta'uh Apu Dios an ta'on on waddaday aggena pinhod an ipa'innilan dita'u. Ya atbohdi an piyalon ta'u nadan ap'apuh tun luta an gapuh pangipa'innilaanda i dita'uh nadan inadalda.

³ Mu adi ta'u damdama pa"innilah nan nomnomnomon nan patul an umat hi analigat di e ta'u panginnilaan hi tinagen di ad lagud ya hay dinallom nan baybay.

⁴ Gahin di ma'aan nan naba hinan silber ya ahi waday maphod hi iyammaana. ⁵ Ot athidih nan patul an gahin di aanona nadan nibahhoy itugunda ya ahi pumhod nan pun'ap'apuwana.

⁶ Adim ipabaktuy adolmuh nan awadan di ap'apu. Ya adi namaag ya e'a inumbun hinan ubunan di nun'abaktun tagu ⁷te udu'dulnay haddom ta ingganah on diday mangalih e'a mi'ibun hinan umbunan di nabaktuy sa'adda mu hanan pa'anon da'ahdi. ⁸ Ya adi'a galagala an e mundalom hinan tinigom an na'at te alina ya wada ha ohah muntistigu an nibahho nan imbagam ya nganne mohpey atom.

⁹ Wada'ey adiyu pun'innawatan hinan hinaggonyu ya udu'dulnay da'yu ya impanuhyu ta adi innilaon nadan tatagu. ¹⁰ Te onha innilaondan he["a](#) nan tagu an adi mabalin an pundinolan te ma"^{id} ha mipa"^{en} he["a](#) ot hidiyey ibabainam hi inggana.

¹¹ Nan nipto' an panapit ya umat hinan mapmaphod an balitu' an nippniphod an niha"^{ad} hinan silber. ¹² Ya umat boh nan balitu' di niyamma an hingat an ta'on on nan nipto' an pamahiwdan hiya ya nabalol hinan tagun pinhodnan matudduwan.

¹³ Nan na'na'unnu an e mangihapit hi way miyahapit ya ongal di iboddangnah nan nannag i hiya te ay ha matnaad an liting hi inumon nadan munggapas an napfangngan.

¹⁴ Nan tagun alyonay waday idatnah iboddangna ya onnot on layahna ya umat hinan bugut ya dibdib an alyon ona iyaliy udan ya onnot on ma"^{id}.

¹⁵ Nan na'anus an tagu ya abalinanan ihapitan di ap'apu ya atbohdi nan ma'uley panapitna ya ta'on on nan paddungnay kimmulhiy nomnomnan tagu ya mabalin an mihapitan.

¹⁶ Wa'e ta waday hinama'yu hi alig ya ono'nongonyu bahan di anonyu te aganyu'eh a'an ya umuta ayu. ¹⁷ Ya nan e pi'ib'ibunnan an hidiyey impa'inghah at'atton ya lo'tat ya umengleday hinaggon ya ahiawan dita.

¹⁸ Nan agge immannung an ipabahul diohan tagu ya dumadag hi ibba an umat hinan hinalung onu nan matadom an pana.^f ¹⁹ Nan e pundinolan hinadan tatagun adi mabalin hi pundinolan ta boddangan ditah nan punligatan ya paddungnay pangalgal ha mun'iwal hi boba onu ha napisay hi ipatnanan idallan.

²⁰ Onha waha umukayungan ya imme'ahdi ta kumpulnay em ikanankanta ya paddungnay waday hugatna ot kuyagam hi binigal onu ha taguh naktol ot aanon di lubungna.

²¹ Wa'et na'agangan nan binuhulmu ya indattam hi anona ya wa'et na'uwoh ya indattam hi inumona. ²² Te nan pangatamhidi ya ongal di ena bumainan hinadan inatnan he["a](#). Ya gapu i naen atom ya waday idat Apu Dios hi gunggunam.^g

²³ Nan e panumtumbu'an hi ibba ya hidiyey lummuu bumungotandan dita an umat hinan dibdib an wada nan mangipa'alih udan.

^f **25:18** Nan pana ya hidiyey nan bokang an usalon nan e mi'gubat. ^g **25:22** Roma 12:20

²⁴ Udu'dulna boy eta umiwe i ha allung mu hanan eta miha"ad i ha bale hi wahdi ha babaih ahawa hi nangodowan.

²⁵ Nan donglon an maphod an ipa'innilada an malpuh adawwi ya aanonay engle an umat hinan matnaad an liting an aanonay inuwoh.

²⁶ Nan nipto' di pangatnan tagu mu indani ya binaliyan ha adi maphod di pangatnan tagu ya nipaddung i ha nakilut an obob an adi mabalin hi ma'inum.

²⁷ Adi maphod on aga'agan hi inum hinan danum di alig an umat hinan hay pohdon ya gahin ahan on ditay nanongnah pemanan di tatagu.

²⁸ Nan tagun aggena innilan mangitpol hi bungotna ya nipaddung i ha bobleh nadadag nadan binattun aladna ta nalakah panggopan di binuhulna.

26 ¹ Undan mabalin ta waday dalalluh nan tiyalgo? Ya unhaot ma"id ha udan hinan ahigapas. Ot athidi bon adi mabalin hi pemanan nan tagun paddungnay ma"id ha nomnomna.

² Hi'on ma"id ha gapuna ya idutan ha ma"id ha bahulnan tagu ya adi mipa'annung te ay hamutin namaagnah tayyapan on adi mungkohop ta pumattuk.

³ Hay puntugun hinan kabayu ya nan huplit ya hana'en dongki ya nan gumo' an ipakamel. Ot athidi bon hay panugun hinan paddungnay ma"id ha nomnomna ya nan hoplat.

⁴ Adim tobtoballom nan nalgom an alyon nan paddungnay ma"id ha nomnomna te tobtoballom'e ya hidiyey atiganan nun'ingngoh ayu. ⁵ Mu hinuddum ya mahapul an tobalon nan paddungnay ma"id ha nomnomnan tagu hinan miyunnu dan hinan a'tna ta innilaona an agge nanomnoman.^h

⁶ Onha waha miyahapit ya hinnagmu ha paddungnay ma"id ha nomnomna ot mamaonay em inomnomam ta paddungnay he'a ot putulom di hukim onu paddungnay imminum'ah kodot.

⁷ Nan tugun an ibagan nan paddungnay ma"id ha nomnomnan tagu ya nipaddung hinan napilay an huki an ma"id ha bikahna.

⁸ Onha pemanan hidiyen paddungnay ma"id ha nomnomnan tagu ot ma"id damdama ha iyatana an paddungnay imbobodmu nan batu hinan palhi'it.

⁹ Ya atbohdih nan tugun an ibagan nan paddungnay ma"id ha nomnomnan tagu an nipaddung hinan napagatan an hoplat an inodnan ha nabutong.

¹⁰ Nan tagun kumpulnay ayagana hi e muntamuh nan ipatamuna an ta'on on nan paddungnay ma"id ha nomnomna ya umat hinan tagun logmonay pana.

^h **26:5** Hay alyon di udum ya onha layah nan pambalmu ya buma'in te ma'awatana mo an nalgom di imbagana. Ya nan udum bo ya alyonday mahapul an tobalom ta innilaona nan nipto'.

¹¹ Nan paddungnay ma"id ha nomnomna an ipanidwanan aton nan nibahhawana ya nipaddung hinan kahun immuta ot anona.

¹² Udu'dulnaot boh nan paddungnay ma"id ha nomnomnan tagu te mabalin an alina ya manomnoman mu nan tagun hay punnomnomnah adolna ya nanomnoman.

¹³ Nan ma'higgan tagu ya dakol di pambalnah nan adina e puntamuwan te alyonay alina ya wahdi ha layon hinan dalanona. ¹⁴ Ot nan athinan tagun ugga mumballin hinan nalo'ana ya nipaddung hinan konob an matuwab on nikalob. ¹⁵ Ot nan tagun nunhiglay higana ya ta'on on ha umiduhana on higanana. ¹⁶ Mu ta'on hi athidiy a'atna ya hay punnomnomna damdamah adolna ya abalinanan abakon di pitun linala'ih on mipu'un hi punhahapitan.

¹⁷ Nan tagun e mi'ibi'biyang i ha munhahannu ya umat hinan tagun dinamuna ha natagal an kahu ot ipudongnay ingana.

¹⁸ Nan nabongang an tagun logmonay pana ¹⁹ ya nipaddung hinan tagun kulukonay ibbana ya ahina alyon hi laylawayahna.

²⁰ Nan apuy ya ma"id'e ha tunguna ya madop. Ot athidi bon midinong nan punhahannuwan hi'on ma"id ha e tumanumbu' hi bumahbah. ²¹ Te nan itungu ya bala ya pabikahona nan apuy. Ot athidiy nipaddungan nan bumahbah an tagun hiyay lummuh punhahannuwan di udum. ²² Nan e panumtumbu'an hi ibba ya hidiyey pohpohdon di tatagun donglon an ay hanan makan an maphod hi pangukmunan.

²³ Nan ay maphod an hapiton di ohan tagu ta panophopnah nan adi maphod an nomnomnomona ya umat hinan dunug an pinintolanda nan nagalato' ta ay madangih. ²⁴ Ot nan athidin tagun maphod di panapitna te ona panophop hinan wadah nomnomnan hihiwona ²⁵ ya adiyu patyon. Te hay nun'onan i hiya ya nadan adi maphod. ²⁶ Ya ta'on hi ipatnanan hophopan nan hihiwon wadah nomnomna ya ma'innila damdamah nan adi maphod an at'attona.

²⁷ Nan tagun mangap'apyah bitu ta agahan di ibbana ya hiyay a'atana. Ya atbohdih nan attaonan mumpulig hi batun tumultul an hiyay matultulan.

²⁸ Ya nan adina pangibagan hi immannung hinan ibbana ya hidiyey panginnilaan an ahiawanah diyen ibbana. Te nan layah an hapiton ya bumahbah.

27 ¹ Adim ilattuwag nan ninomnommun atom hi bigat te aggem innilay ma'at i he"ah bigat.

² Hay maphod ya nadan tataguy mangal'alih amaphod di pangatmu ta bokon he'a on imbagabagam di amaphod di pangatmu.

³ Nan batu ya gahal ya naligat an pahonon. Mu inyal'alanan naligat hi pangitpolan hinan umipabohol an at'aton nan paddungnay ma"id ha nomnomnan tagu.

⁴Nan ma'abbungot an tagu ya nunhiglan atatakut. Mu inyal'alanan atatakut nan ma"annel.

⁵Udu'dulnay iingal nan hi ibba hinan nibahhawana te hidiyey panginnilaan hinan pamhodmun hiya mu nan alyom hi pohpohdom nan hi ibbam an ta'on on adim ipatigoy pamhodmu.

⁶Udu'dul nan nahamad an gayyum te madinolta an ta'on on mahkit di pangihingalnan dita mu nan maphod an ipatigon nan binuhul ya adita madinol.

⁷Nan na"abhus an tagu ya ta'on on nan danum di alig ya adina pohdon an tamtaman. Mu nan na'agangan ya ta'on on nan mumpait ya maphod di panamtamna.

⁸Nan immadawwih nan nunhituwana ya umat hinan hamutin tinaynanay buyana ta e umanin'innabat.

⁹Nan mapmaphod di hunghungnan lana ya nan insenso ya umipa'amlong an umat hinan maphod an tugun nan ibba.

¹⁰Adim iwalong nan nun'ibba'ibbam ya nan nun'ibba'ibban amam te mahapulmu'ey boddang hi udum hi algo ya diday pumpaboddangam ta adi mahapul an em ipa'ayag nan wadah nidawwin boble an hi ibbam.

¹¹Imbabale', maphod on manomnoman'a ta pa'amlongona' ta wan waha pambal'uh nan mamihul i ha'on.

¹²Nan nanomnoman an tagu ya tigona'en waday adi maphod hi ma'at ya adi e mihaggan hidi. Mu nan agge nanomnoman ya onnot ayna e damuwon ta ahina holholtapon nan ma'at i hiya.

¹³Nan mangihapit hi umutangan ha mangili ya mahapul an waha alanyun hiya hi nabalon an gina'una ta waday pangidonanyuh nan utang an namamah on ha mi'ilala'in babai ha inhapitna.

¹⁴Onha hiyah mun'abigat an agge ni' bimmangon nan hinaggonmu ya imme'a ta em itkuk di pangapngam i hiya ot hay pun'awatna ya mamadpadngol'a.

¹⁵Nan ma'angoddon babain ahawa ya ay lomlom an umipahiga ¹⁶ya ma"id ha mabalin hi mangipadinong i hiya te umat hinan dibdib an adi mabalin hi padinongan ya umat boh nan lana an adi mabalin hi magamal.

¹⁷Nan gumo' ya hay pungkikil ta matadoman ya gumo' damdama ot athidi boh nan tagun hay pun'adalana ya nan ibbana bon tagu.

¹⁸Ipapo"e nan bungbunga"an ya waday ibunganah anon. Ot athidih nan baal an ipapo'na'eh maphod nan ud baal i hiya ya waday pamiyal diyen ap'apuna i hiya.

¹⁹Nan punnomnom diohan tagu ya hiyay mangipa'innilah nan a'atna an umat hinan mapaganan liting an uhdungan'e ya hay angah di tigon.

²⁰Nan ma"omnon tagu ya ma"id ha upuh di omnawana an umat hinan lubu'an an ma"id ha alyonah ammunna mo.

²¹Nan apuy ya hiyay pummahmah hinan balitu' ya silber. Mu nan a'at di tagu ya mabalin an ma'innilah nan maphod an ibagan di udum an a'atna.

²²Nan paddungnay ma"id ha nomnomnan tagu ya ta'on hi punhoplat ta ingganah on tuwen mate ya hiya damdaman adi maluman.

²³Ipapo'muh maphod nan halunmu ²⁴te hay kinadangyan ya nalakan mama"id an umat hinan pun'ap'apuwan di tatagu an adi minaynayun hi inggana. ²⁵Ot eyu pun'ala nadan dagami ya holo' an manuluh nadan nabillid ta midadaan hi ipa'anyuh nan halunyu ot tumuluda bo. ²⁶Ta nadatngan'ey pumpukisanyuh nadan kalnero ya mabalin an waday iphodyuh lubung. Ya na'en gulding ya mabalin an inginayuy udum ta punggatangyuh luta. ²⁷Ya nadan udum an nabati di pangalanyuh gatas hi inumonyun hina'amma ya an namin nadan miha"ad i da'yu.

28 ¹Nan adi maphod di pangatnan tagu ya namaaggon binumtik an ta'on on ma"id ha mamdug i hiya. Mu nan nipto' di pangatna ya umat hi layon an madinol an ma"id ha itakutna.

²Gapuh nan pumbahulan an at'atton nadan bimmoble ya adi madne on nahukkatan nan mangipangpangulun dida. Mu onha nadan nun'ala'ing ya nun'anomnoman di mangipangpangulu ot minaynayun an pumhod hidieny boble.

³Nan nawotwot an palpaligatona nadan ibbanan nawotwotⁱ ya umat hinan lomlom an dumadag hinan nitanom.

⁴Nan munggoheh nan tugun ya mapto' te unnudana nadan adi maphod di pangatdan tatagu. Mu nan mangunud hinan tugun ya adina unnudan dida. ⁵Te nadan imminghan mangat hi adi maphod ya aggdeda innila nan nipto' an pangat. Mu nadan tatagun hi Apu Dios di dayawonda ya innilada.

⁶Udu'dul nan nawotwot an adina aton nan nibahho mu nan kadangyan an kuluk di pangatna.

⁷Hay immannung hi nanomnoman ya nan na'na'unnuh hinan tugun. Mu nan imbabalen e mi'mi'"uyug hinadan nun'ahupu ya hiyay lummuh ibabainan nadan a'ammodna.

⁸Nan kumadkadangyan an gapuh nan ongal an pumpapulsintunah nadan ipa'utangna ya waday adi maphod hi ma'at i hiya ya nan inamungna ya umeh nadan tatagun hummo' hinadan nun'awotwot.

⁹Hi'on adim unudon nan tugun Apu Dios ya ta'on on nadan dasalmu ya nunhiglan umipabungot i hiya.

¹⁰Onha he"ay lummuh pumbahulan nan nipto' di pangatna ot lo'tat ya he"ay mabahbah an gapuh nan at'atom. Mu nan adina aton nan nibahho ya waday maphod an gunggunana.

ⁱ 28:3 Nan nawotwot ya hay alyon di udum an Biblia ya nan ap'apu.

¹¹ Nan kadangyan ya hay punnomnomnahadolna ya hiyay nanomnoman. Mu nan nawotwot an nala'ing ya innilanay immannung hi a'at diyen tagu.

¹² Onha nan tagun maphod di pangatnay mangabak hi mun'ap'apu ot mun'am'amlong nadan bimmobile. Mu onha nan adi maphod di pangatnay mangabak ot mun'ipa'e nadan tatagu.

¹³ Nan tagun hophopanay bahulna ya ma"id ha atongan mipaphod. Mu nan iba"agnay puntutuyuhanah nan inatnan pumbahulan ya hom'on Apu Dios ta linglingonay numbahulana.

¹⁴ Mipa'amlong nan tagun waday takutnan mangat hi adi maphod mu nan manginaynayun hinan adi maphod an impa'inghana ya madadag hi umudi.

¹⁵ Nan adi maphod di pangatnan mun'ap'apuh nadan nun'awotwot ya atatakut an umat hinan mun'olmom an layon onu nan mabungot an bear.

¹⁶ Ya nan ap'apun mamalpaligat hinadan tatagu ya ma"id ha innilana. Mu nan ap'apun aggrena pinhod di kuluk ya madney pun'ap'apuwana.

¹⁷ Nan pimmate ya ma"id ha linggop di nomnomna ya adiyu hom'on ta ukod i hiya ta inganah mate.

¹⁸ Nan maphod di at'atonan tagu ya mihwang hinan adi maphod an ma'at mu nan kuluk di pangkiye"ena ya lo'tat ya namaag ya nadadag.

¹⁹ Nan mahlun e muntanom ya dakol di pangalanah anona. Mu nan tagun hanan ma"id ha hunungnay ahiwana ya minaynayun di awotwotana.

²⁰ Nan tagun na'na'unnuh hinan tugun Apu Dios ya nanongnan mipa'amlong. Mu nan aptuwanay kumadangyanana ya ma"id ha bahhonan madusa.

²¹ Adi maphod on waday pangipangngelan hinan punhumalyaan. Mu hiyay at'atton di udum an ta'on on kittang ha midat i didah bayadda.

²² Nan ma"kuh di ataguna ya pohdonan ma'ibagan kumadangyan. Mu aggrena innilan lo'tat ya hiyay makulangan.

²³ Nan pamahiwam hinan nibahhon at'aton diohan tagu ya udum hi algo ya munhanah diyen tagu i he"a mu ma"id ha punhanaana hinan tagun ipadngolnay pangipabaktuna i hiya an ta'on on agge immannung.

²⁴ Nan tagun iye"enay gina'un di a'ammodna te hay punnomnomna ya agge nibahhoh diyeh atona ya nipaddung hinan mangako.

²⁵ Nan ma'a'ungnguh an tagu ya hiyay lummuh punhahannuwan. Mu nan tagun hi Apu Dios di nanongnah pundinolanah nan mahapulna ya hiyay pumhod.

²⁶ Nan tagun hanan wah nomnomna ya ammunay pundinolana ya agge nanomnoman. Mu nan tagun donglonay tugun di nanomnoman ya ma"id ha itakutna.

²⁷ Nan tagun innilan hummo' hinadan nun'awotwot ya adi makulangan hinadan mahapulna. Mu nan ma"id ha homo'nah nadan maligatan ya idutan di tatagu.

²⁸ Wa'et nan adi maphod di pangatnan taguy mun'ap'apu ya mun'ipa"^e nadan tatagu. Mu mapogpog'ey pun'ap'apuwana ya nan maphod di pangatnan taguy mihukkat.

29 ¹Nan tagun impakulhinay nomnomna ta adi mo patugun ya lo'tat ya ma'ibagan madadag ta adi mo mabalin hi maboddangan.

² Ya hi'on maphod di pangat nan ap'apun diohan boble ya mun'am'amlong nadan tataguna. Mu adi'e maphod di pangatna ya mahmo' nadan tatagu.

³ Nan tagun pohdonan manomnoman ya ongal di pun'amlongan nan a'ammmodna. Mu nan tagun hanan mabayadan an binabajen ena i'uyu'uyugan ya upuhonay pihhuna.

⁴ Ya nan ap'apu an nipto' di atanon mumpapto' ya minaynayun an pumhod nan boblen pun'ap'apuwana. Mu nan ap'apu an hay pihhuy gagamgamana ya madadag nan pun'ap'apuwana.

⁵ Nan tagun hughugnudonay ibbana ya paddungnay nangapyah hulu ta aknaana.

⁶ Ya nan adi maphod di pangatnan tagu ya nan pumbahbahulanay manadag i hiya. Mu nan nipto' di pangatna ya hiyay waday amlongna.

⁷Nan nipto' di pangatnan tagu ya pohdonan nan nipto' di ma'at hinadan nun'awotwot. Mu nan adi maphod di pangatna ya adina nomnomnomon dida.

⁸ Nan nunhiglay pihulnan tagu ya nan lummuh abahbahan diohan boble di atona. Mu nadan nanomnoman an tatagu ya abalinandan padinongan nadan ma'abbungot.

⁹Onha nan nanomnoman an tagu ya ena idalom ha paddungnay ma"id ha nomnomnan tagu ot ma"id ha pohodnah eda punhahapitan te nan paddungnay ma"id ha nomnomnan tagu ya namaagnah bungot onu namaagnah ngihil ta ma"id ha poto'na.

¹⁰ Ya nan tagun impa'inghanan pumate ya ma'ahihhiwoh nan maphod di nomnomna mu nadan maphod di pangatda ya ipapo'da nadan ibbadan tatagu.^j

¹¹ Nan paddungnay ma"id ha nomnomnan tagu ya adi bumain an mangipatigoh bungotna. Mu nan nanomnoman ya abalinanan itpol di bungotna.

¹² Wa'et nan ap'apu ya patiyona nadan layah an ibagadan hiya ot lo'tat ya mumbalin hi adi maphod di pangat nadan munhilbin hiya.

¹³ Hay numpaddungan nan nawotwot ya nan mamalpaligat i hiya ya hi Apu Dios di nalpuwan di nitaguwandan duwa.

¹⁴ Nan ap'apu an mangita'dog hinadan nun'awotwot ta adida makuluk ya madney pun'ap'apuwana.

^j 29:10 Hinan udum an Biblia ya alyonday nan impa'inghanan pumate ya ma'ahihhiwoh nadan maphod di nomnomda ta pinhodnan patayon dida.

¹⁵ Nan panuplitan hinadan u"unga ta atugunanda ya bumoddang hi anomnomanda mu nan unga an adida pahiwon ta ukod i hiyah nan pinhodna ya lo'tat ya hiyay lummuh ibabainan nan a'ammodyn.

¹⁶ Ya wa'e ta nadan adi maphod di pangatday mun'ap'apu ya mamammamay pumbahulan di tatagu mu ahi tigon nadan nipto' di pangatda di adadaganda.

¹⁷ Gahin di tugunom nan imbabalem ya ahi'a madinol an atona nan umipa'amlong i he"a.

¹⁸ Nan himpamoblen bokon nan miyunnuhan hinan hapis Apu Dios di atonda ya ma"id ha panuh di ma'ma'at hinan numboblayanda. Mu nan tagun mangun'unud hinan tugun Apu Dios ya hiyay mipa'amlong.

¹⁹ Nan himbut an adi matugun hi hapis ya abuh ya ta'on hi ma'awatana nan mibagan hiya ya adina unudon.

²⁰ Udu'dul nan paddungnay ma"id ha nomnomnan tagu mu nan tagun namaagnah hapis.

²¹ Onha nan himbutmu ya inhipunmuh a'ungan an indat i hiyan namin nan pinhodna ot hay umudi ya an namin nan wadan he'a ya alana.^k

²² Nan tagun hi kittang on bimmungot ya dakol di pumbahulana ya wadanwaday pi'hannuwana.

²³ Nan mumbaktun tagu ya hidiyey lummuh ipada"ulana. Mu nan mumpada"ul ya hiyay mipabaktu.

²⁴ Nan bumodboddang hinan mangako ya paddungnay ahiawanay adolna te gapuh nan insapatana.^l

²⁵ Nan hay taguy takutana ya paddungnay naknah nan bitu mu nan mundinol i Apu Dios ya malinggop di nitaguwana.

²⁶ Nadan dakol an tatagu ya hay eda pumpaboddangan ya hinan ap'apu. Mu aggeda innilan hay nahamat hi pumpaboddangan ya hi Apu Dios te nan nipto' di ma'at.

²⁷ Nan nipto' di pangatnan tagu ya aggena pinhod nadan tatagun adi maphod di at'atonda. Ya atbohdih nadan adi maphod di pangatdan ma'hihiwidah nadan nipto' di pangatdan tatagu.

30 ¹Datuwe nadan impa'innilan nan imbabalen Jakeh an hi Agur an alyona i Itniel ya hi Ukal di,^m ²Ha'on ya ma"id ha in'innila' ya ma"id ha ma'awata' an aya' tayya bokon tagu. ³Ya agge' inadal di a'at di la'ing ya ta'on on nan a'at Apu Dios ya ma"id ha innila'. ⁴Te undan waha immeh ad abunyan ot ahi mumbangngad hitun luta? Ya undan waha taguh mabalin an

^k **29:21** An namin nan wadan he'a ya alana ya hay alyon di udum an Biblia ya hiyay mangdat hi hakit di nomnommu. ^l **29:24** Nan munitistiguh nan miyahapit ya munsapata an ibagana nan tinigona mu adina'e ya madusa te nibilang hi numbahul. Lebitikus 5:1

^m **30:1** Nan alyona i Itniel ya hi Ukal ya hay alyon di udum ya na"bleya' an ma"id ha bikah'u.

gamalona nan dibbib ya ha abalinanan gu'uhan hi lubungna nan liting? Ya undan waha taguh nangiyammah nadan pogpog hitun luta? Ot hi'on waday innilayu ya ibagayuh on nganney ngadana ya hay ngadan nan imbabalena.

⁵ Hi Apu Dios ya ipa'annungnan namin nan hinapitna. Ya hiyay paddungnay hapiyon nadan mihi"ug i hiya. ⁶ Ot adim udman nan hapit Apu Dios te alina ya tinitilog da'a ta ma'innilan munlayah'a.

⁷ Hay odawo' i he'a Apu Dios hi atom i ha'on ta ahiya' mate ya datuwen duwa. ⁸ Hay oha ya boddangana' bahan ta adiya' munlayah. Ya hay mi'adwa ya ta'on hi adiya' pakadangyanon mu ta adi ahan bo nunhiglan ma'ma"idana'. Ot hay odawo' hi idatmu ya nan umdah hinan mahapul'u ya abuh. ⁹ Te onha nin bo mahawwalan di mahapul'u ot alina ya alyo' hi adi' mo mahapul di boddangmu. Ya onha bo ha ma'ma"idana' ot alina ya eya' mangako ta lummuh pamihulandan he'an Dios an dayawo'.

¹⁰ Adim e analyon di pama"ihmuh nan himbut hinan ud himbut i hiya te alina ya he"ay idutana ta holtapom nan inatmu.

¹¹ Wadaday udum an tatagun idutanday hi amada ya atbohdin adi maphod di hapitondah nan hi inada.

¹² Ya wadada boy tatagun hay punnomnomda ya nipto' an namin nadan at'attonda mu layahda te hiyah diyen agge nahukkatan nan adi maphod an pangatda.

¹³ Ya wadada boy udum an hay punnomnomda ya dida ahan di maphod an ma"id ha nipaddung i dida.

¹⁴ Ya wadada boy udum an tatagun ma"id ha homo'dah nadan nun'awotwot an onnot on mamaonday punligatanda ta dida ni' ahan di kumadangyan.

¹⁵ Hitun luta ya wadaday opat an agge nanginnilan mahingla ta umatdah nan mato'. ¹⁶ Datuwen opat ya nan lubu' ya nan babain ma"id ha imbabalena ya nan namaganan an luta an mahapulnay udan ya nan gimmanab an apuy ta adi mabalin hi madopdopan.

¹⁷ Nan tagun ngohayonay hi amana onu pihilonay hi inana ya udu'dulnay ukiton di hamutiy matana ya nun'a'an di gayang di adolna.

¹⁸ Wadaday opat an matigoh tun lutan nakaskasda'aw di a'atda an naligat hi ma'awatan.

¹⁹ Datuwe ya nan aton nan agila an mangintatagen tumayap ya nan aton nan ulog an mumbulluhan hinan doplah ya nan aton nan papol an mangi'wah nan tu'yap nan baybay ya nan aton nan lala'i ya babain mumpohhodan.

²⁰ Hay pangat nan mi'ilala'i ya iluktapna nan ahawana ya ahi mohpe e mun'amoh ya alyonay, Ma"id attog ha nibahhoh inat'u.

²¹ Wadaday opat an adi ahan maphod an ma'ma'at hitun luta

²² an datuwe ya nan himbut mu indani ya numbalin hi patul ya nan paddungnay ma"id ha nomnomna mu hiyay maphod di anona

- ²³ ya nan babain ma"id ha mamhod i hiya mu indani ya nalahin ya nan himbut an babai mu indani ya hiyay nihukkat hinan ud baal i hiya an babai.
- ²⁴ Hitun luta ya waday opat an nat'onat'on an ta'on on kikkitangda mu na'ala"ingda.
- ²⁵ Datuwe ya nan gulom te ta'on hi ma"id ha bikahda mu tiyalgo'e ya hinumrudan mangidadaan hi anonda
- ²⁶ ya nan kuneho te ta'on on adida mabikah mu abalinanda damdaman mangiphod di baledah nan doplah
- ²⁷ ya nan dudun te ta'on hi ma"id ha patulda ya napanuh di atondan mange
- ²⁸ ya nan banbanaggo te mabalin an piditon mu mabalin bon wadadah nan balen di patul.
- ²⁹ Ya wadada boy opat hinan limmun Apu Dios an maphod hi tigon di panallanda.
- ³⁰ Datuwe ya nan layon an abikbikanan hi an namin di animal ta hiya nan ma"id ha tumakutana
- ³¹ ya nan tangbal an gulding ya nan kawitan ya nan aton nan patul an dumallan hi way hangngab nadan tindaluna.
- ³² Hi'on mumbaktu'a onu munnomnom'ah adi maphod hi atom ya udu'dulnay duminong'a ni' ta munnomnomnom'a. ³³ Te umat hinan gatas an kiwakiwalon'e ya lo'tat ya kumohdol. Ya huntukon'e bo nan olong ya dumala. Ya atbohdin attaan'en pabungoton di ibba ya waday mun'a"awit.
- 31** ¹Datuwe nan imbagan nan patul an hi Lemuel an intugun inana i hiya. ²Alyonay, Imbabale', he"a ya nawada'a an gapu ta hiyay imbagabaga' i Apu Dios hi ma'at ot hiya nan donglom tun tugun'un he"a.
- ³Bokon hay binabai di pangiyayam hi pihhum ya bikahmu te hiyah naey lummuh nabahbahan di udum an patul. ⁴Ya donglom Lemuel tun ibaga' te hay patul ya adi e mangmanginnum. Ya bokon hay na'ingil an ma'inum di nonomnomona. ⁵Te mabutong'e ya linglingona nan ni'uldin ya aggena inat nan lebbengnan ma'at hinadan nun'awotwot. ⁶Hay mabalin hi manginum hinan na'ingil an ma'inum ya nan mun'atte'atte an adi pa"itpol hi dogohna. ⁷Ta uminum'e ya alina ya malinglingling bahan hidiyen punligatana.
- ⁸ Ya he'an patul di mangihapit hinadan mahmahmo' an adida abalinan an mangibagah nan lebbengnan ma'at i dida. ⁹Ot mahapul an boddangam dida ya ta nipto' di atom an mangipanuh i dida ta adida makuluk.

Nan Babain Ahawa An Maphod Di Pangiy'e"ena

¹⁰ Naligat an hama'on di linala'i nan babain maphod di pangiy'e"ena an paddungnay nababalol mu nan nababalol an batu.

¹¹ Ta ma'dinnol nan ahawanahan lala'i i hiya an namamah nan atonan mangipapto' hinan bino'lada ta adida makulangan hinan mahapulda. ¹² Ya minaynayun an maphod di pangatnan ahawana an ma'id ha atonah bumahbah i hiya. ¹³ Ya innilanan mumpilih nadan maphod an hinulid te pinhodnan abolon. ¹⁴ Ya mahlu bon e manigoh anondan hina'amma an ta'on on idawwiy pangalana. ¹⁵ Ya adi mahuyyaman an bumangon ta wan e munha"ang hi anon nan pamilyana ya intuddunay tamuwan nadan puntamuwona. ¹⁶ Ya pa'annomnomona ni' on ahina hinubliyan ha luta. Ya inusalna nan bino'lana ta tanomanah greyp. ¹⁷ Ya mahlun tumamatutamu te mabikah.

¹⁸ Ya ta'on boh on nahdom on muntamu ya waday hilbin nadan tamuna. ¹⁹ Ya hiya boy mumpudun ta abolona ta iphodnah agamidonda. ²⁰ Ya innilanan hummo' hinadan nun'awotwot ya nadan mahapulnay boddang. ²¹ Ya adi minomnoman hinan kumog onu lowang te indadaana tuwaliy ma"atung an lubung nan pamilyana. ²² Ya hiya boy mangapyah iyabo'dah nan alo'anda. Ya maphod di tigona te munlubung hi maphod an linen. ²³ Ya nan ahawanahan lala'i ya innilan di tatagu te hiyayohan mibilang hi mangipangpangulu i didan bimmoble.

²⁴ Ya hay udum hi aton nan babai ya mangiyammah udum an linen an lubung ya bal'oh ta inginana. ²⁵ Ya waday pamiyal di tatagun hiya. Ya adi minomnoman hinan ma'at hi udum hi algo. ²⁶ Ya ma'uley panapitna ya nala'ing an muntugun. ²⁷ Ya ipapto'nay pamilyana ya adi ma'ahigga. ²⁸ Ta mun'am'amlong nadan imbabalenan hiya. Ya atbohdin nanongnan haphapiton ahawanay amaphod di pangatna. ²⁹ Ta alyonay, Dakol di binabain maphod di pangiyeda mu impohpohod di pangiyem.

³⁰ Nan maphod an tigon diohan tagu ya uma"ul te mabalin an maluman. Mu nan babain waday takutna i Apu Dios ya mapemanan. ³¹ Ot nan athidin babai di midattan hi gungguna ta hiyay bino'lana. Ot lebbengnan lispiuwon di tatagu an gapuh nan maphod an atona.